



بِسْمِ اللّٰهِ الرَّحْمٰنِ الرَّحِیْمِ

ممنوع الضحك

بِسْمِ اللّٰهِ الرَّحْمٰنِ الرَّحِیْمِ

إهداء

إلى البسطاء، أصحاب القلوب البيضاء.

د.حنان لاشين

(أم البنين)

مقدمة

جرب أن تراقب طفلا يضحك وستضحك.
جرب أن تراقب نفسك وأنت تأكل وستضحك.
جرب أن تراقب ثناؤب رضيع وستضحك.
نضحك أحيانا على أنفسنا،
ونضحك أحيانا دون قصد على أخطاء الآخرين،
ويضحكنا الصغار ببراءتهم،
والبعض ينتزع منا الضحك بتلقائية وفن،

وقد نصاب أحيانًا بعدوى الضحك.

عندما نضحك فجأة؛ نحن نفتح أبواب السعادة لتتنفس أرواحنا.
سنصف مواقفنا نعيشها في حياتنا اليومية في كل البيوت،
وبعض الحوارات الزوجية، والكثير من السلوكيات الخاطئة التي
لا ننتبه لها أحيانًا في المسجد وأحيانًا ونحن نزور الآخرين، وقد
تحدث عن اختيارك لنصفك الآخر.

ولكن....عندما نتحدث عن "حصاد الغربية"، وآلام الوطن في
صباح مشرق، حتماً سيكون الضحك ممنوعاً للحظات ولكنها
لن تطول!

من فضلك

اضحك معنا فأسنانك ليست عورة

ولا تصدق أبداً أن... "ممنوع الضحك"

1

إزاي تبسط مراتك

"1-ابتسم وأنت تفتح باب البيت فشكلك أجمل وأنت مبتسم

"

(اعمل نفسك متفاجئ بالولاد وحاول تكون مبهج هي أصلاً

كانت هاتعجنهم وأنت لحقتهم.)

"2-قول لها وحشتيني إيه الشياكة دي"

(ما تدققش لو لسه لابسه نفس الفستان بتاع أول إمبارح ..
قول وخلص وهي هاتفهم وتلبس واحد جديد)

"3-استرها وما تقولش لحد على غلطاتها".

لو في يوم حرقت صينية البطاطس خليك ستر وغطى عليها
وافتكر لها طاجن البامية اللذيذ بتاع السنة اللي فاتت وسامحها
ماكلنا حرقنا البطاطس .

"4-ساعدتها في شغل البيت"

لو لقيت تراب على السفارة هات فوطه و لمع علشان

تكسفها..أ..قصدي

أو ارسم عليه قلب وسهم وحرف اسمك واسمها وسيد التراب

وهي بعد كده هاتأخذ بالها.

"5-اديا مصروف تجيب بيه اللي نفسها فيه وخصوصًا لو مش

بتشتغل .. بيفرح قوي"

(حتى لو جابت بيه جيلي كولا ما تناقشهاش)

"6-اكتب لها جواب ولو مرة كل شهر"

(حسن خطك وحطه في المطبخ علشان تتأكد إنها هاتشوفه

أول ما تصحى من النوم

أصلها بتقوم فورًا من السرير على المطبخ علشان تأكل أأ...
قصدي تطبخ)

"7-طبطب عليها زي الأب ما بيطبطب على بنته ...الست
رقيقة بتحتاج كدة"

(بس مش وهي بتصرخ للعيال .. مش وقته .. طبطب عليها
بعد ما تقدم لك صينية الكنافة وتخلص شغل البيت وتعد
ترتاح .. ساعتها بتبقى مهدودة فعلاً)

"8-اشكر فيها قدام أهلك"

(ما تجيش سيرة التراب اللي على السفارة)

وفي أخلاقها وطبيخها

(انسى صينية البطاطس)

وصبرها على العيال

(حاول تنسى صوت صريخها وهي بتغير لابنك)

وشياكتها

(بغض النظر عن العباية البرتقاني أم كسر)

"9-ما تقارنهاش بجد علشان هي ما تقارنكش بجد"

مش لازم تحكي عن زميلتك في الشغل الباشمهندسة فوزية

والدكتورة حسنية

وتشكر في شخصيتها وترغي وهي قاعدة في البيت منقطعة عن

العالم

وضحت بطموحها الدراسي وطالع عينها وفي الآخر تشكر في

عنايات وهي قاعدة

عيب ما يصحش.

"10- احكي لها عن يومك حاجات يمكن بالنسبة لك بسيطة

بس هي لما بتعرفها وتلاقيك بتحكي بتحسسها بالأمان"

الستات بتحب الأخبار (فراغ) سيها تعيش دور المحقق كونان
وجاوب على أسئلتها

"11- خرجها مرة كل أسبوع"

الحبس في البيت بتخفق..أو اسمح لها تزور صاحباتها

"12- اشكر في أهلها حتى لو مش بتحبهم دور فيهم على أي

حاجة حلوة"

"13-هاتلها ورد "

بلاش دباديب دول للمخطوبين بس..وهاتلها شوكلاتة..حلوة
الماندولين"

"14-افتكر أيام الخطوبة"

"15-لما تتعب وتسخن ارقيا وادعي لها واعمل لها ينسون
واظهر شوية تعاطف"

(حاول تخبي فرحتك)

"16-لو خارجين واشتريتوا حاجه ما تشيلهاش كل الأيكاس
كفاية عليها كيس."

بالله عليك .. هي أسيرة عندك وكانت فرحانة بيك وعشمها
فيك كبير، فما تخيش ظنها وحطها في عينك واتق الله.

2

أفكار رومانسية

عزيزتي حواء ركزي معايه

عيشي مع زوجك لحظة حلوة ..

بس ما تقفيش على سور البلكوتة وتقوليله تعالى نعمل زي

تايتانيك، هايزك ويقول انتحرت

مافيش تايتانيك وأصلا الفيلم متصور في طشت.

(بس ممكن تتفرجي معاها على صور خطوبتكم).

ابعتي له جوابات حب وعطريها بالبارفيوم اللي بيحبه

بس ما تكتبيش على ورق (بجك) وتطبقهم مربعات

وتحطيهاله في الرز ..علشان وهو بياكل يلاقها يروح مطلعها

ويقراها ويفرح

هيبلعها وتقف في زوره وأنت حرة

(اكتبيها في جواب وحطياها على السفارة جنب الطبق)

رتبي أمورك ونظمي وقتك واخرجني معاه

بس بلاش تقوليله لما تروحوا مطعم اسحب لي الكرسي وقعدني

الأول لأنه منتظر الفرصة دي من زمان وهيوقعك علشان يبقى

بيهرز معاكي ومش حارمك من حاجة

(أقعدني قدامه علشان مايشوفش غيرك)

ونفسه تتسد .. أأأ. قصدي علشان يشوف نفسه في عيونك
وابتسمي).

لما يدخل من الباب حسسيه إنك فرحانه بدخلته.

بس بلاش تعيشي الدور وتلبسي الجيبة أم كرانش وتنططي
وتغني أهلاً أهلاً بالعيد لما يرجع من الشغل... هيتصدم ويقفل
الباب تاني وهيتغدى لوحده في كنتاكي.

(البسي فستان شيك وسرحي شعرك بطريقة حلوة).

حسسيه إنه غالي عليك

بس بلاش تقلبيها دراما وتقوليله وأنت بتعيطي أنا بجبك ومش
عارفه لو جرى لك حاجة هاعمل إيه من غيرك أنا والعيال .. يا
نكديّة

(اضربي واحده سنكرز...أنتِ مش أنتِ وأنتِ جعانه).

حطي فازه فيها ورد على السفرة

بس بلاش تقطعي الورد وتعمليله طريق من باب الشقة لحد
الطبلية ... أأأ... قصدي السفرة إبنك اللي بيزحف هيفتكه
حاجه تتاكل وهياكله وهيجيله إسهاال

وأنت اللي هتسهرى بيه ... بلاش الورد

(خدي يايده وامشي معاه لحد السفرة).

الإضاءة الرومانسية

بس بلاش العشاء على أضواء الشموع مها عملي مش هتداري
غلطتك هيعرف إن الفرخة لزقت في الطاسة وأنت بتحمرها
واتهرت .. أكله في النور.

(الأباجورة .. إضاءة رومانسية).

اعمليله مفاجأة تبهره

بس بلاش تفاجئيه وتروحيه الشغل ..

لو دكتور .. هيقول دي مريضه عندي

لو محامي .. هيقول زبونه ولها قضية

لو مدرس .. هيقول والدة تلميذ فاشل عندي

على ابنك

لو مهندس .. هيقول لقيتها في الموقع تحت العمارة اللي اتهدت

لو ضابط .. هيقول دي مجرمة أنا قبضت عليها وهيوديكي

السجن

(خليكي في البيت أحسن).

بلاش تستخبي ورا الستارة علشان يقلق ويدور عليك ..

أولا: هيتسرع

ثانيا: مش هيدور عليك أصلا وهتفضلي ورا الستارة .. بلاش

إديله أكبر حته في الفرخة

أكله قبل ما تاكلي

غطيه لما ينام وطبطني عليه

خليكي حنينة

ووطي صوتك

وبلاش الشبشب أبو كعب في البيت.

3

احترس من المرأة

عندما تراقب زوجتك، ستلاحظ أنها تكرر بعض العبارات،

فلا تهملها... واحترس فأنت في خطر...

كنت فين؟

جملة خاطفة تخرجها الزوجة بمهارة وهي تجلس بهدوء مصطنع
على كنبه الأتريه

بعد تأخر الزوج وتأكدها أنه كان يضحك وهو واقف مع زميله
في الشارع

ساعة ونص وهي قلقانة

(ننصح بالاتجاه فورًا لأحد الغرف مع اصطحاب الأطفال وغلق
الباب حتى تهدأ).

يا بختك

جملة حقودة موجهه للزوج

وهو يستعد للخروج مع رفاقه لمشاهدة الماتش في النادي ..

تكون الزوجة في حالة من الغليان تحمل مخلوق صغير يصرخ

مع وجود كائن آخر يبشده في هدمها ونلاحظ ضيق العين
اليمني واتجاه الفم للناحية اليسرى مع هز الرأس بهدوء وهي
تتكلم

(نصح بعدم الخروج حرصًا على سلامة الزوج).

عاوزين إيه من زفته؟

جملة موجهه للأبناء ...

تحاول فيها الأم التعبير عن حالتها بعد يوم طويل من العمل

الشاق

بدون راحة

نصح في هذه الحالة بالهروب من البيت

هااااااااااا

صرخة عالية تخرج تلقائيا عند اقتحام صرصار للمجال الأسري
تحاول الزوجة من خلالها إخراج ميول إجرامية وتخرج طاقات
مكنونة بقتل أحد أعداء الأسرة
(نصح بالتصفيق لها وتشجيعها).

الصمت

الصمت شيء مقلق ويسبق العاصفة وتصاحبه آثار سلبية
تظهر بوضوح على الأبناء
(محتاجين يستحموا)

والمطبخ

(المواعين ماتغسلتش)

نصح في هذه الحالة بالمسح على رأسها بحرص والطبقة على
كتفها بحنان

والسماح لها بالبكاء

(خلاص هي ضربت وكان لازم تفصل علسان تقدر تكمل)

عاوزه ورد يا إبراهيم

جملة تكررهما المرأة عندما تفتقد الرومانسية

(هي مش مجنونة ولا نسيت اسمك هي شافت الفيلم بتاع هند

صبري ...

لازم تجيب ورد حتى لو اسمك مش إبراهيم).

ربطة النينجا

هي ربطة للرأس تجيد الزوجة لفها بمهارة على رأسها
مع عقدها من الأمام على شكل فيونكة ونلاحظ كبسها على
الجبين فتظهر العينان بشكل ضيق

لكنه يسمح بالرؤية

(نصح بتكرار كلمة سلامتك يا حبيبي كل دقيقتين مع التأكيد
على تناول حبايتين بانادول ومج نسكافية وشوكولاتة جالاكسي
والصبر لحد ما الصداع يروح).

عبارات تسمعيها من زوجك

"جعان"

نداء عاطفي يطلقه الزوج فور دخوله البيت ويلاحظ تشوش في الرؤية وظهور علامات الإرهاق والتأثر.

(نصح بسرعة الغرف والقلبي والتحمير حرصًا على سلامة الزوجة ونبشركم بعدم انتباهه لغياب الملح في الأكل لأنه جعان)

وما تقوليلوش ساعتها إيه رأيك في تسريحة شعري.

"أنا رايح أنام"

جملة تحذيرية قد تظهر بصيغة إخبارية (بس هي مش كده خالص) يلاحظ فيها رفع وتقوس الحاجب الأيسر وإشهار إصبع السبابة أمام وجه الأطفال لكنها في الحقيقة موجهة للزوجة

..

(علشان تبطلي تسرسي كل شوية وتقولي للعيال وطوا صوتكم بابا نايم)

"الشأااي"

صرخة رعدية تسمع على المغربية بعد استيقاظ الزوج من النوم العميق.

(ننصح بالاتجاه فورًا إلى المطبخ وإعداد الشاي وترديد أذكار
المساء)

"۱۱۱۳هـ"

حروف مبعثرة تخرج عفويًا من فم الزوج مع هز الرأس وارتعاش
الجفن الأيمن مع ضيق العين وازرقاق الشفتين عندما تبدأ
الزوجة في الشكوى من أخواته يتبعها عاصفة رعديّة.

(ما تقوليلوش دول اخواته مهمن كان ..عيب)

وابقي خلصي حقتك من إخواته البنات أول بأول في ساعتها
على طول واللي تشد لك شعرك شدي شعرها وخالصين
وطبعًا لو سامحتي أحسن وخلي قلبك كبير.

"مش عاوزة حاجة من برة؟"

رسالة sms قد تبدو رومانسية لكنها انتقامية تحذيرية تصل
على هاتفك النقال

(علشان تبطل تنزليه تاني يجيب البامبرز بعد ما طلع السلم يا
مفترية)

"ليه؟"

سؤال استنكاري! استفهامي؟

بعد طلب الزوجة ل ألف جنية علشان تجيب عباية جديدة
لفرح سامية.

(في هذه الحالة رجاء القبول بأي مبلغ وكفاية تجيبي طرحة
جديدة وطرزي العباية اللي عندك بزراير بيجامته الكحلي)

"بأقول لك إيه"

مع مد حرف الياء .. جملة رائعة تنهي الحوار فجأة وتؤدي إلى

هرب الزوجة مع سماع صوت عجيب

وهي تنسحب من أمامه مصدرة صوتًا لولبيًا...هي إلهي إلهيؤأ

(ده صوتك أنتِ لما تنوي النكد يا حبيبتى عارفاكى أنا عارفاكى)

"وبعدين بقى! اللهم طولك يا روح."

(ده لما تطولي في النكد)

"ياااه أخيرًا"

لأ..لأ....مش يقولك، أينعم هو فرحان بس هو أصلًا ما

خدش باله إنك سرحتي ولبستي شبشب ...

(ده الأهلې جاب جون)

"أنا بحبك"

"وأنت أجمل ست في الدنيا وباعيش معاك أجمل أيام حياتي"

(وفي الحالة دي خلاص تاكدي إن صينية البسبوسة طلعت

تحفة...تسلم إيدك).

5

ألو...بحبك

(قبل الجواز أيام كتب الكتاب)

هي لابسہ بیجامہ صفرا مرسوم علیہا تویتي وبتتفرج علی صور
الخطوبه

وهو قاعد فی البلكونه ولابس التي شيرت البرتقاني و یشرب
شاي

والجو جميل

هو: ترررررن

هي: آوو

هو: إزيك يا حبيبي

هي: إزيك يا حياتي

هو: أنا جاي النهاردةمش مصدق

هي: ولا أنا ...ما تنساش باحب أشوفك بالتي شيرت الأورانج

اللي عليه زرافة

هو: يا ريت تلبسي الفستان الفحلقي اللي له ديل وجناحات
وارفعي شعرك لفوق علشان قفاكي بيان.

هي: بس كده ... حاضر من عيويني.

هو: خلاص أنا رايح ألبس وجاي حالاً أهه.

هي: وأنا رايحة اعمل لك كيكة الجزر بالشوكولاااا..

هو: طب ياللا اقفل عشان مش قادر اقفل السكة في وشك
خايف اقفل على مناخيرك.

هي: لأ اقفل أنت الأول.

هو: لأ أتتي.

هي: لأ بليز أنت.

هو: خلاص أهه.

هي: الله.. أنت لسه ما قفلتش!!

هو: هع هع هع

هي: نياهاهاها

بعد الجواز

هو بالقميص طول النهار وعرقان عرق السنين وقاعد في العربية
مستني الإشارة تفتح.

وهي واقفة في المطبخ بالبيجامة المقلمة اللي جيبها مقطوع

وماسكة المعلقة الخشب

وبتقلب الأكل

وشايله ابنها العسل وهو بيعيط ومناخيره سايحة وبيشد شعرها.

هي: حاضر بس أصل

هو: بس أصل إيه!!

هي: لسه الرز بيتشرب على النار وصينية البطاطس فاضل لها

تكة وتتسبك ...والسلطة أهه خلاااص

يعني يا دوب ساعة إلا ربع كده.

هو: أمال أنت كنتي بتعملي إيه طول النهار؟

هي: ابنك مغلبنى ومطلع عيني ..آه ماتنساش تجيب البامبرز

لاحسن هو لابس آخر واحدة

وريحته طلعت وأنا مش راضية أغير له وخايفة يجيله تسلخات.

هو: مش كنت تقولي من بدري

هي: أا.. ألو.. قفل السكة في وشي... يا غلبي ياني.

هو: لا ماقلتش أنا باحبكوا قوي.

هي: ياااه ...أخيرًا ...فاكر أيام خطو ...ب ...أأأ ...ألو ...أنت
قفلت السكة

صح النومالجواز مسئولية.

رمضان كريم يا ستات

الستات والبنات

اللي رايجين يصلوا التراويح في رمضان القادم

إن شاء الله

بلاش علبة الكيك وصنية الكنافة

وترمس الشاي مش لازم تأكلوا بين الصلوات كلوا لما تروحوا.

(عارفين إنك شاطرة)

بنتك الصغيرة فرحانة بصوتها

زي أصالة وماجدة الرومي

وبتغني في المسجد وتنط على راس البنات وأنت بتصلي

وابنك اللي بيسنن سخن و يبصرخ الظاهر سنانه بتاكله
والناس مش بيسمعوا الإمام.

(اتفقي مع جارتك أنت تصلي في المسجد يوم وهي يوم واقعدوا
بالولاد وارحموهم)

مافيش حاجة إسماها محجوز ما تحطيش الشنطة جنبك وتبرقي
للبنات وتقولي محجوز

وتستني جارتك على بال ما تخلص المواعين وتيجي
(المسجد مش أوتوبيس)

بالنسبة للغلبانة اللي جنبك

مش لازم صباeck الصغير يلزق في صباعها لو بعيدة وبطلي
ترغزغيا.

رجليك شكلها كده غلط وشكلها وحش وهم بعاد قوي عن
بعض.

(مش هاتستحملي وهاتقعي في الآخر)

ما تطلعيش تجري بعد الصلاة بالخمار علشان تلحقي المسلسل
من أول المقدمة وتتفرجي على الرقاصة.

(فايدته إيه مرواح المسجد)

بلاش تلبسي العباية اللي بتلمع وتبرق بالترتر والخرز
لأنها بتنور في الضلمة والناس بتتخض.

(ده مش لولوليبيني فرح)

بلاش تنزلي تصلي بالإسدال بتاع البيت

قماشته خفيفة ويبين الجسم

ألسي أحسن عباة عندك

(أنت مش طالعة تنشري في البلكونة يا شلبية)

بطلي تبحلقي في البنات

وتدوري لإبنك على عروسة وتنادي عليهم بصوت عالي.

(بصي من تحت ل تحت)

وأوصيك بالبنات الهادية الرقيقة اللي على طبيعتها ومش

حاطين مكياج وبيقعدوا ورا)

جاركم أبو أيمن عرف كل حاجة لأنه سمعك في المسجد

من ورا الستارة

وأنت بتحكلي لصاحبتك على مقادير الكنافة بالقشطة

والمكسرات

(ها يقول لمراته وحاتعرف سر المهنة وطى صوتك)

بلاش يا بنات الكعب العالي

لأنه ملفت... وبيععمل حاجات وحشة.

(تريك تراك تريك تراك قدام المسجد والمصلين واقفين ها

يبصوا غضب عنهم ويتفرجوا)

روج وكحل وأحمر خدود وأنت رايحه تصلي..

ليه!

(يا رب الإمام يخشع في الدعاء وتعيطي والكحل يسبح)

البارفان بلاش منه في المسجد

وعلى فكرة ما فيش واحد ها يشمه يقوم يحبك فجأة

ويجري وراك وأنت طالعة من المسجد علشان يخطبك من بابا

(اللي بييجي في الإعلانات كله كذب)

لو الفطار كان فيه فته وخل توم خليك مكانك ما تتحركيش
من البيت وهاتولها هدية

أميين

الرجال اللي يعلوا صوتهم فيها

أنت صوتك حلو وناعم ومسمسم

وده مسجد

وبلاش أوبرا عايدة

قولها بصوت واطي

علشان ربنا يكرمك

في السجود إدعي في شرك

المسجد كله عرف إن ربك بتوجعك و جوز أختك ضربها
بالقلم وإنك بتدعي عليه

بطلوا تتعاركوا على النور وشوية تطفوه علشان الخشوع وشوية
تنوروه وتدوروا على العيال

وما تنسوش تنضفوا المسجد وبلاش ترموا مناديل ورق في
الأرض علشان

ده بيت ربنا.

وحشنى رمضان.

اللهم بلغنا رمضان

رمضان كريم للرجال

بمناسبة رمضان

الإخوة والشباب اللي رايجين يصلوا في المسجد
ما شاء الله ربنا يزيد وبيبارك

ممنوع منعا باتا تروح المسجد بالشراب اللي كنت لابسه طول
النهار

واتعمى تراب وبعدين مسحت عليه والمية والتراب والهوا عملوا
جريمة أنت كده "طاغية"

في ناس بتصلي في الصف اللي وراك وممكن تحصل إغماءات

في إختراع اسمه "عطر" و أحيانا يدعى "بارفان" وبينادوه في

بعض العائلات "كالونيا" يا ريت تستخدمه علشان تسعد

الناس وتداري الأحزان.

الصنادل والشباشب اللي بتركن على باب المسجد بطريقة
عشوائية وتكعبل اللي رايج واللي جاي
وفي الآخر تتعاركوا على الشباشب اللي شبه بعض وأتم
مروحين...رصوها بنظام...كل شبشب جنب أخوه علشان
الزحمة

ولو ما فيش مكان ممكن الصندل يركن صف ثاني
وممكن حد من الشباب يتطوع وينظم المرور
اللبس اللي حضرتك قاعد بيه طوال النهار (الترينج المخطط)
ونمت بيه، وصحيت بيه، وأكلت إبنك حمادة بيه، والشوربة
وقعت عليه وبقعته، ما ينفعش تروح بيه المسجد لأن ريحته
طبيخ وعرق، إلبس أحسن لبس عندك وأنت رايج المسجد.
لو مدام "شلبية" أبدعت في الفطار النهاردة، وفي قنابل
ومتفجرات في المحشي يبقى أنت "إرهابي"
، والكوارع كانت ممتازة والخل والتوم والفتنة كانوا حكاية بلاش

تنزل

أو أجلهم بعد التراويح رفقا ورحمة بالمصلين

انزل بدري مش لازم تتأخر على بال ما برنامج المسابقات
يخلص أو شيكابالا يجيب جون والإمام يكون بدأ الركعة الأولى
ودخل في السورة اللي بعدها، وتجري في الشارع علشان تلحقه
قبل ما يركع، رمضان مش بييجي كل يوم

وكده كده مصر مش ها تلعب في كأس العالم ريجوا تقسم.

الشباب الصاعد، بلاش البنطلون الهابط، والسلسلة
والأنسيال، وبلاش تلبس ال تي شيرت اللي عليه صورة
مادونا وأنت رايج تصلي التراويح

أکید لازم تركز العربية وتلحق الصلاة بس بلاش في وسط

الشارع

الناس ها تدعي عليك، وممكن حماك تتعب والإسعاف تيجي
ويكونوا عاوزين يعدوا من الشارع ده تحديدا لإيقاظ حياتها بعد

بص لك شذرا وقال لك سكته بلاش تديله بالبونية وتنزل فيه
ضرب، وخليه يبطل يزغزغ الناس في رجليها وهم ساجدين
وممكن لو حد قال لك حاجه تبتسم وخلص.

الراحة اللي بين الركعات الإمام يقول نصيحة قصيرة لو شفت
أستاذ كمال اللي ساكن في الشارع اللي وراكم مافيش داعي تنط
من فوق رقبة اللي قاعدين وتأخده بالحضن وتساله عن سوسن
هي خلاص إتجوزت وها تولد وألف مبروك، وأقعد إسمع
الإمام.

اعمل الموبايل صامت، أو طففيه خالص واكتمه، وما تطلعوش
تلعب Games بين الركعات ولا تبعت رسايل لحد، وبلاش
رنة غير لائقة في المسجد،

ويا خوفي...يا خوفي... لتكون الرنة عشرة بلدي

وكل سنة وأنتم طيبين.

8

عبقرية الستات

إحنا كستات عباقرة الحقيقة و اخترعنا أكثر من لفة للطرحه..

الحجاب الفرعوني

وده عبارة عن شوية طرح فوق بعض على شكل هرم وبتظهر
البت لو قصيرة من أسفل الطرحة بشكل ملحوظ والطرحة
دي ما بتتحركش حتى لو في رعد وبرق وبتدفي في الشتا.

حجاب شم النسيم

وده حجاب مبهج ويوحى بالسعادة والفرحة شبة فساتين صفاء
أبو السعود الجميلة كده بس للأسف في أحيانًا جرس بيرن في
دليل الطرحة

(آه والله جرس وبيرن)

علشان لو أنت بتحود من على الناصية بالعجلة هي تهز راسها
وترن الجرس تقوم أنت تسمعها ما تخبطهاش.

حجاب سوبر مان

وده بركوله من فوق وشاح زي بتاع سوبر مان ويثبتوه

بدوسين على الراس من على الجنين

وها تلاقية بيطير وراها

(لو مراتك وزهقان منها اشتريهولها وزقها من البلكونة وقول إنها

كانت بتقلد سوبر مان)

حجاب البنت المقموصة

وهي بصراحة مش مقموصة ولا زعلانة من حد ولا متكبرة ما

تظلموهاش

هي بس خايفة تهز راسها فوق وتحت وتقول أهلا وسهلا إزي

حضرتك وما تقدرش تبص يمين لما تنادي عليها وتقول أيوه لأن

رقبتها ها تبان

والطرحة يا دوب خنقاها ومدخلاها في رقبة الفستان بالعافية.

الحجاب الفسفوري

وده مفيد جدًا لو النور اتقطع وأنتوا في الشارع حاتعرف مراتك على طول وممكن تنشئ على دماغها وتحذفها بأي طوبة واهي فرصة وما حدش شايفك .. وأول ما النور يبجي بلاش تفرح وتقول هيبديه لأنها هاتعرف.

حجاب صندوق الدنيا

وهنا ها تلاقي مفاجأة تحت الطرحة علبة سمينة روابي

أو علبة آيس كريم فاضية

والنوع ده مفيد جدًا

لأن ممكن تشيلي فيها أي حاجة

الموبايل مفاتيح العربية سندوتشات وممكن كتايت

(كتايتو بني)

عبقرية دي والا مش عبقرية يا متعلمين يا بتوع المدارس؟

9

شايفاك

أيوه.... هي شايفاك

شايفاك وأنت بتكور الشراب وترميه تحت الكنبه.

شايفاك وأنت بتعمل نفسك مش واخد بالك من قشر اللب

اللي وقع في الأرض.

شايفاك وأنت بتقول لها بحبك والأكل ها يقع من بقك

(مش لازم تقول لها وأنتوا بتاكلوا)

شايفاك لما رجعت من الشغل وأنت بترمي القميص وتحذف

الجزمة

(ها تحب في وشها على فكرة كانت واقفة وراك)

شايفاك وأنت بتاكل الزبادي اللي بالفراولة

(هي قالت لك تأكله لبنتك مش أنت اللي تأكله)

شايفاك وأنت صاحي من النوم وشعر راسك مسافر وخدودك

وارمة

شايفاك وأنت بتتفرج على نشرة الأخبار

(وأنت مركز مع المديعة استني لما المذيع يبجي واتفرج)

شايفاك وأنت بتاكل بطيخ

(اعمل نفسك مش شايفها ولا يهيك دي مفترية وبتعمل أكثر
من كده)

شايفاك وأنت بتجري على الموبايل قبل ما هي تمسكه علشان
تفتح رسايل صحابك

(بتعايوا على الستات ليه في النكت)

شايفاك وأنت بتتفرج على صور خطوبة نيفين بنت خالتك
(كانت فاكة الحجاب ارمي الصور بسرعة)

شايفاك وأنت بتبص لعيون زميلتك وأنت بتكلمها لما زرتوهم في
البيت

(حاول دايمًا تبص للنجفة لما تكلم ست قدام مراتك)

شايفاك وأنت بتتفرج على ماتش الأهلي و الزمالك وبتبرق
للعيال وهي بتعدي من قدام التلفزيون وأنت بتتفرج
(أبو تريكة جاب جون)

شايفاك وأنت بتعد الفلوس من وراها
(هات لها هدية)

شايفاك وأنت بتدعي عليها...أأأ...قصدي بتدعي لها بعد
صلاتك

شايفاك وأنت بتداري فرحتك...أأأ...قصدي دمعتك وهي
عيانة

شايفاك وأنت بتشاور لمامتك علشان ما تأكلش من البيتزا اللي
هي عاملها

شايفاك وأنت داخل بجزمتك في الشتا بعد ما مسحت الأرض

شايفاك وأنت بتهرب منها وهي بتغسل المواعين

(مش عاوز تساعدنا ليه)

شايفاك وأنت عامل نفسك نايم علشان ما تشيلش ابنكم اللي

طول الليل يعيط

شايفاك وأنت بتتاوب وعرفت انك شايل اللوز

(مش لازم توربها ضرس العقل المسوس على فكرة)

شايفاك وأنت بتضحك

شايفاك لما تحبها

خد بالك بتراقبك هي والعيال

شايك

هو شايك وأنت بتبرقي لابنك علشان كب العصير على
السريير.

وشايك وأنت بتكزي على سنانك لما ابنك كتب في الواجب
حرف السين معوج ونازل من على السطر
(ياشيرة).

وشايك وأنت بتخطفي الأكل من العيال
(قلنا هاتي لك كيس شيبسي معاهم وكل واحد ياخذ نصيبه)

وشايفك وأنت بتكلمي مامتك في التليفون وعوجتي بقك وأنت

بتحكي لها على زيزي بنت عمك

(يا تحفة)

وشايفك وأنت بتاكلتي سندوتش الطعمية

(آخر واحد في الأربعة)

وشايفك وأنت بتتاوي وفاتحة بقك زي سيد قشطة

(يا ستير يا رب)

وشايفك وأنت بتدوري على القملة..ق..قصدي على التوكة اللي

في شعرك

وشايفك وأنت رابطة راسك وأنت بتنضفي الشقة

(ويحاول ينسى)

وشايفك وأنت بتنطقي الإنجليزي غلط وأنت بتكلمي رانيا

وشايفك وأنت ماسكة الشبشب وبتذاكري للعيال

وشايفك وأنت بتبطلقي في الأرض وتدوري على دبوس

الطرحة اللي وقع منك

(قلنا خدي بالك واشبكيه في حاجه تتشاف)

وشايفك وأنت بتشدي بنتك من شعرها علشان خدت

الريموت وقلبت القناة وجابت المسلسل اللي أنت مش عاوزاه

يشوفه علشان البطلة حلوة

وشايفك وأنت صاحيه من النوم

(قمر أربعنا الشر)

وأول ما النور بيتقطع بيفرح ويقول هيبه يا رب يفضل مقطوع

...

وأول ما يبجي هو اللي بيصرخ
وشايفك وأنت ماسكه الكتاب وقاعدة دلوقتي زي الأروبة

(اتعدلي وابتسمي وحطي رجل على رجل)

على فكرة بيراقبك

آه والله

وربنا ما يجرمكوش من بعض.

في حاجه اسمها كده.. جبر الخواطر

يعني لما تلاقي جوزك جايب لك هدية بسيطة على قد فلوسه
تفرحيه وتبيني إنها عاجباكي..

(أصبري ولما يكون معاه...ها يجيب لك كتير)

يعني تعمل لها مفاجأة وتتجوز عليها

(...أأ.. قصدي تجيب لها هدية)

يعني لما تلاقي مراتك عامله كيكة وحرقتها تعمل نفسك مش
واخذ بالك

وتاكلها وأنت مبتسم وتقول تسلم إيدك يا حياتي

(ابلع بشاي بلبن بيساعد)

يعني لما تلاقيا ضاربة شعرها في الخلاط وحاطه كاري علشان
يصفر واشترت توكة وستان جديد تفرحها وتقول لها إيه ده هو
القمر جه عندنا يا ولاد

(حاول ما تضحكش .. ممكن تبص للنجفة وأنت بتقول كده)

يعني لما تطخن بعد الولادة ما تقولهاش في وشها وتجرح
شعورها انت لازم تخسي يا كلبوزة

(اتصال من مجهول إنك بتدور على عروسة حايخسها النص)

يعني لما يزعلك ويعمل نفسه عيان تسامحيه وتعملي نفسك
قلقانة وتعددها وتفتكري له الخير وتجري عملي له كمادات

(بلاش الحقن)

يعني لو حابة تتكلم اسمع لها.

(إسألها وزنها كام وهي هاتتكم وتبطل وتقوم تعمل لك شاي)

يعني لو هايغير القناة علشان الماتش تقدي ساكتة وتشاركيه
اهتماماته.

(ممكن تدعي على الفريق اللي بيشرجه في شرك وخدي

راحتك)

يعني لو طلب أكلة تطبخها فورا ...علشان هو حبيبك.

(زودي السمنة خليه يطخن علشان البنات ما تعاكسوش)

يعني تفكره بأول مرة شفتيه لما جه يطلب إيدك.

(انسي القميص الأخضر والبنطلون البني هو مش ها يعمل

كده ثاني)

يعني تفكرها بيوم ما خرجتوا أول مرة بعد كتب الكتاب

(معلش انسي اللي حصل في المطعم كانت جعانة ما تحكيش

الجزء ده)

يعني لما تنادي عليها تدلها باسم جميل

(لو فتحة قولها لها يا فيفي ...عنايات يا توتو..انشراح يا شوشو
...أشجان يا جيبي ...وكده)

يعني تقولي للولاد بصوت يسمعه لما يرجع من الشغل ويفتح
الباب بابا حيينا القمر جه

(هو كويس ما تقلقش حا يضحك بعد شوية هو بس خد باله
من شعرك)

جبر الخواطر سهل...بس إحنا بننسى.

12

تعرفي إزاي إن جوزك بيحبك

(دائماً بيتسابق معاك عاوز يفرحك)

ولما تلاقيه وأنتوا راجعين من كارفور وشايلين الأيكاس بيضربك
مقص برجله ويطلع يجري على السلم ...

(بيحبك وعاوزك تدخل الجنة)

مش أنتِ تصحي على صوته وهو ييلطش لك بالأقلام ويقول
لك..قومي صلي قيام الليل.

لما تطلبي حاجة مش بينساها

(معلش هو البيروسول طلع معاه صدفه وهو بيدور على مزيل
العرق)

لما يقول لك تستنيه كل يوم ورا الباب علشان ييقى وشك أول
حاجه يشوفها لما يدخل.

(و يرزك في صباع رجلك الصغير غصب عنه ... غصب عنه
ما انت كمان فرمتي رجلاه غصب عنك)

لما يصحى قبلك ويمشي على طراطيف صوابعه علشان ما

يزعجكيش

(مش يهرب إطلاقًا)

لما ينام بعدك ويظمن عليك ويغطيك بنفسه

(أخيرًا نامت...أحمدك يا رب)

لما تلاقية فجأة وأنتوا بتاكلوا خطف من إيدك ورك الفرخة ونزل فيه أكل

(هو بس حب ياكل من الحطة اللي أنت أكلتي منها
بشفايفك...رومانسية وكده)

لما تلاقيه هبش من إيدك كباية العصير

(عاوز برده يشرب من الحطة اللي أنت شربتي منها أصله
بيحبك)

بيجيب لك طلبات البيت

(ماعدنا برطمان النوتيلّا اللي طلبتيه)

لما تخرجوا بيشيل الولد على قلبه

(شيلي أنت الأكياس يا حلوة...الولاد بتهدل الطرح والهدوم
وحافظي على شياكتك)

بياكلك بإيده

وبيزنق دماغك في ركن المطبخ ويحط اللقمة في بؤك
(لوعي تفتكري إن ده علشان تبطلي رغي لا سمح الله)

بيشكر فيك قدام أهله

علشان بيحبك والله مش علشان ما يشمتوش فيه)

بيجيب لك هدايا

(زي السشوار اللي بيكهرب..فاكراه)

بيفليكي..أأأ...قصدي يسرح لك شعرك ويعمل لك ضفاير

(رومانسي)

بيفسحك ويوديكي البحر

(مش ذنبه...انت اللي اتكعبتي في العباية وكنتي ها تغرقي)

بيكتب فيك شعر

(الحلزونة يا أما الحلزونة)

أهو ده الحب

شفتي بقي

وربنا يجبه فيك كمان وكمان...اللهم لا حسد.

حاجات ما تتنسيش

كل واحد فينا عنده ذكريات حلوة.. وحاجات جميلة ما تتنسيش..

صاحبك الطيب اللي كان قاعد جنبك في ابتدائي.

كراسة الرسم و الألوان الشمع .

جزمة المدرسة الجديدة اللي بتوجع وتعمل بقبقة في رجلك.

يوم تجليد الكتب والكراسات.

ريجة الأقلام الرصاص الجديدة.

البراية والأستيكة أم ريجة حلوة.

كيس الساندويتشات وجرس الفسحة.

كباية المية اللي بتتفتح وتتقل ولها غطا.

حصة الألعاب والفرحة بالصفارة.

رحلة الأهرامات وصورتك عند أبو الهول مع صحابك.

شف الخرايط وتلزيقها في الكراسات.

ريجة كحك العيد وقعدتك جنب مامتك وهي بتعمل البسكوت

ولما تديك عجينة وتبوظها وتخبزها لك وتاكلها وأنت فرحان.

فانوس رمضان اللي فرحت بيه وطفيت النور علشان تتفرح

عليه مع اخواتك.

شكل فلوس العيدية وأنت بتعدها.

مراجيح العيد وألوانها.

آخر لحظات قبل الفطار في رمضان وأنت بتعلم بالمية والعصير.

فوازير رمضان وأنت صغير وأنت بتفكر في حلها وتكتبها.

لمة العيلة والسهر وصوت ضحكهم ورتتها وحكاوي زمان

وذكرياتهم وأنت بتنعس وتنام على رجل مامتك.

اللعب مع ولاد عمك والعراك معاهم وضربهم والغيرة الشقية.

خروف العيد وصوته وهو بيأماً

السفر في العربية أو القطر وأنت فاكر إن القمر ماشي معاك

وبتعد الشجر على الطريق والهوا بيخبط في وشك.

المصيف والبحر والشمسية والطيارات الورق والفريسكا

والجردل والجاروف وبيوت الرمل.

الذرة المشوي وأنت واقف مستني تشتري وماسك الفلوس في
إيدك وصوت فرقعته في النار والبياع ييهوي على النار بكرتونة.

حضن تيتة وضحكة جدو.

مفاجأة خالتو وهديتها.

طعم الآيس كريم ولوليتا بالفراولة.

كارت عيد الأم اللي كتبته لمامتك وباستك بوسة كبيرة
وحضنتك وفرحت بيه.

صوت مفتاح الشقة لما باباك يرجع وتجري أنت واخواتك على
كيس الفاكهة إلي معاه علشان تشوفوا فيه إيه.

النور لما يقطع واللعب بالأيدي قدام نور الشمعة والضحك على
شكل الخيال على الحيط

الفرحة وصرخة هيبه لما النور يبجي ثاني.

وحشتني نفسي وأنا صغيرة.

14

حصاد الغربية

حقيبة السفر، وصوت الطائرة، ودموع أمك، ودموعك، إنها بداية الرحلة. تلك اللحظات عندما تغادر أرض الوطن ويرحل فيك الوطن! فتحمله هنا في صدرك وتشعر لأول مرة أنه يوجعك. أجبرك على الرحيل بغلق الأبواب.. تقلص فيه كل

شيء حتى الرغيف و غاب الأمن والأمان.. الآن ترحل، تاركا
خلفك، فصول الربيع الحلوة، ونسمات الشتاء الباردة، وبعض
الذكريات. ستجد نفسك في أرض أخرى كنبته خضراء اقتعلت
بجذورها من أحب بقاع الأرض إليها، فتمزقت الأطراف ونقلت
لترية أخرى وسقيت بماء آخر طعمه يختلف عن ماء نيلنا
الحبيب، ذاك الذي لوثته بقاينا لكننا نجه، وسنظل نعشق
طعم مائه العذب. ستعيش... لكنك ستشعر بوحدة. العيد
سيكون صوته بارد على الهاتف. رمضان لن ترى زينته في
الشوارع، ولن تقف مبتسما وأنت تراقب تعليق الفوانيس.
ستغيب رائحة الفول والسهر للسحور. حزن أمك سيكون
على شاشة الحاسوب لكنك ستشعر بدفء دموعها لأنك
ستبكي.. ربما ستفاجأ بخطبة أختك، أو بزفاف صديقك،
وسيرسلون لك صورة وتعليق. ستضحك أحيانا... لكنك

ستدخر الفرحة حتى تعود وكأنك لا تراها ملائمة لغربتك. وإن
عدت سيبتعدون قليلا لأنهم يظنون أن كل أيامك كانت ضحك
وفرح ومرح وثقود وربما يخلون عليك بالابتسامة. سيراقبون
هاتفك الجديد وساعة يدك وحروف الماركات الشهيرة المخطوطة
على سترتك... ستشتري كثيرا وكأنك تبحث عن شيء
يفرحك... وتدخر مالا ستتعب فيه بشدة وستدفع ثمنه من
عمرك وسيفوتك الكثير.. وسيتوقعون أضعاف أضعافه فأنت
(سافرت بلاد بره ومعاك فلوس). سيشككون في وطنيتك...
ولو ناقشتهم سيسكتونك لأنك بعيد ولا تشعر بمعاناتهم. رأيك
الذي كان هاما ويؤخذ به سيكون أحيانا رأيي فقط يسمع ورغم
صحته لن ينفذ لأنهم سمعوه بعد فوات الأوان. أقرب الأصدقاء
سينشغلون عنك، ستبدأ برسائل ومكالمات عميقة وحارة،
وستعتاد ويعتادون على غربتك وستبقى علاقات الحب العميقة

أغلبها ذكريات حلوة. سترتبط بوطنك الجديد، لكنه سيعاملك
معاملة الطفل اللقيط فأنت لا تشبه أبناءه لكنه سيرحب بك
ما دمت تنتج وتعمل.. واحذر فرما يلفظك في لحظة على قارعة
الطريق، فأنت غريب. ربما ستمل أحيانا من إجازاتك لأن الجميع
سيدخر كل المشكلات طوال العام ليقصها عليك بتفاصيلها
وسينسون أنك جئت لترتاح. مطلوب منك مجاملة الجميع
خلال زيارتك القصيرة حتى لو مر على المناسبة شهر طويلة
ولن يشعر أحد بمرضك وأنت وحدك في غربتك. غربة مرة.. لا
تحليها إلا تلك الوجوه الباسمة التي ستلتقيها في المساجد فتعرف
فلانا وقد أوجعه وطنه أيضا في صدره فتبدأ صداقات جديدة
وحب في الله من نوع آخر لم يركض من قبل على أرض
المدارس ولا ساحات رياض الطفولة. عندما تمرض هم
سيزورونك، ستطبخون معا وتخرجون معا وتضحكون معا

وكل منكم يحمل قصة من ماضيه ربما يسامركم بها في ليلة.
ستلدين في غربتك وربما تلتفتين فلا تجدين أمك لكنك
ستأكلين من يد صديقتك السورية والأخرى المصرية وتلك
الفلسطينية فكلكن غريات. ستكونون أسرة كبيرة،
وستجتمعون في رمضان والعيد سيكون بطعم مختلف. ستربتون
على أكتاف بعضكم وتطيب بعض الجروح. ستتحرق الآن من
قيدك... ستضحك من قلبك وستفرح هنا حيث أنت..
ستحب حياتك وتعود كل عام وأنت أقوى ولن تؤلمك ردود
أفعالهم لأنك ستفهم... فالوطن في الحقيقة ليس في الأرض ولا
في الحدود ولا في العلم، فكلها رموز.... الوطن فيك أنت..
(أنت الوطن).. اللهم رد كل مغترب لوطنه، واجعله وطنا آمنا
مطمئنا، واحفظ أحبائنا في كل بقاع الأرض

15

الليلة الأخيرة

أوقف سيارته أمام باب البناية التي يقطنها مع أسرته
الصغيرة، هرول على الدرج مشتاقا لابنتيه الحبيبتين،
أخرج المفتاح من جيب سترته وأداره في الباب بهدوء وسار
على أطراف أصابعه،
كان يهيم بدخول غرفته عندما تناهت إليه هممة منخفضة قادمة
من غرفة البنات،
كتم أنفاسه ووقف ينصت لزوجته التي كانت تتحدث إلى
شقيقتها على هاتفها النقال
بعد أن نامت ابنتها... حيث هتفت غاضبة:
ها أرييه والله لأرييه

شعر برجفة تجتاح جسده وازدرد ريقه بعصوبة فأردفت وهي
تتوعد:

مش ها أخليه ياخذ نفس حتى في البيت

ضاقت أنفاسه وشعر بألم شديد في صدره فأملت:
أكل إيه اللي ها اعملهوله...وأتعب نفسي ليه!!..يا رب يموت
مسموم

وضع يده على معدته وشعر بتقلص شديد فأردفت بصوت
حاد:

-لا مش أول مرة دي اتكررت كثير قدام عيني

وضع يده بهدوء في جيب بنطاله وأخرج الهاتف وقام بإلغاء
المحادثة التي كانت بينه وبين "ريري" تلك الفتاة الخليعة التي تثرثر
معه على صفحة الفايسبوك بكل ما فيها من عبارات غزل
وحب وغرام
وسمع زوجته تقول:

ليه...أصبر...أصبر ليه والدنيا تخرب وبيتي يتهدل...لالالال..أنا
صبرت خلاص وقلت هايسيننا لوحده وسهلت له كل الطرق
حدق في الظلام وصارت دقات قلبه كطبول الحرب وعاد لهاتفه
وقام بإلغاء الصداقة التي بينه وبين تلك الفتاة بينما عادت زوجته
تهتف:

ها أضلمها له ومش ها أخلي أي حاجة في البيت....ها أموته
من الجوع

إبتلع ريقه بصعوبة وهي تكمل:
-لأ...وليه أستنى....ما أنا أقدر عليه لوحدي ولا يهمني
بدأ يرتجف وقرر أن يسير ببطء نحو باب البيت ليهرب منها
بينما كانت تقول برتابة:
-خلاص ها أسيبك بقى لأحسن الوقت مر ولازم أقوم
سار خطوتين فقالت:

طبعاً مش ها أحسس البنات أنا نيمتهم بدري النهاردة لأني
خلاص نويت له على نية سودة

أسرع مهرولاً برعب نحو الباب وقد إرتفع صوتها قائلة:
-اللية....لازم تكون آخر ليلة في حياته

كاد أن يدير مقبض الباب لولا أنها إقتربت وهي تضع الهاتف
على أذنها فرأته وقالت بعد أنها سريعا المكالمة مع شقيقتها
وابتسمت:

حبيبي إتاخرت ليه؟

في فار دخل المطبخ تاني...عاوزاك تساعدني علشان نقتله سوا
يا حبيبي

قال بحماس وصوته يرتعش:
-والله لأدبجه وأكسر دماغه...هو فين؟

قالت بمرح:

اقفل الموبايل الأول وركز معايا وما تقعدش تقلب فيه زي كل

يوم

قال بثقة:

-لا ما أنا خلاص ... حرمت يا حياتي.

16

الشيخة فيفي

ذات صباح في بيت هاديء دار الحوار التالي:

- حبيتي صباح الخير

استغفر الله العظيم أنت ما تعرفش إن صباح الخير بدعة ..
الشيخ عبد الهادي اتكلم عنها في كتاب
الكلام الأخير في حكم صباح الخير

- طب خلاص السلام عليكم.

- قولها كاملة علشان الثواب وعليكم السلام ورحمة الله وبركاته
زي نصيحة الشيخ عبد السلام في كتاب
آراء الإمام في كيفية إلقاء السلام.

- ودول بتسمعيهم في الراديو يا فتحة.

- قول لي يا فيفي

- هي فيفي دي مش بدعة؟

- طب ما تقولهاش قدام إخوانك

دول الشيوخ اللي بييجوا في التلفزيون.

- صحيح, كويتي لي القميص والبنطلون.

- معلى نسل أصلل كل بصلل قلال للل وسهرل لل
الفجر.

- ما شاء الله طلل النهارده اللملس مش هنروح لأمل ده أنت
ما شفلهاش من شهر.

- لأ روح أنت وخذ الولاد أنا رالعة درس الشلخ همالم
فل
كفلة صلة الأرحام

- خلاص لما ترجعل اعملل لنا بسبوسة بالأنانس والكرلم
شأنله لالحسن أكلها عند واحد صاحبل ونفسل فلهما.

- استغفر الله أنت ما تعرفش إن الكريم شائتيه فيه شبهه في
مكوناته إنها تحتوي على ودان الخنزير.

- أعوذ بالله .. بلاش .. طب وبالنسبه للبسبوسة.

- من إسمها أهه (باس .. بوسة) أنت ترضى إني أعملها.

- لأ طبعا .. أقنعتيني الصراحة ... طيب هنفطر واللا بدعة .

- هنفطر طبعا تحب تفطر إيه.

- والله أنا جعان جوع السنين اعلمي أي حاجة مش بدعة ولا حرام وأنا هاكلها.

- طب ها أصلي الضحى الأول وارجع لك.

- ما تتأخرش.

*** بعد ساعة ..

تيكيلام تيررين تيكيلام

(صوت المعلقة وهو يقرب الشاي وهي داخله بطرحة الصلاة).

- إيه يا حبيبي أنت عملت شاي.

- وفطرت كمان يا ست فيفي.

- أنا يا دوب قرئت الورد بتاعي. وكنت جايه خلاص أعمل لك الفطار.

- ولا يهكم .. بأقول لك إيه.

- نعم يا حبيبي.

- هو الشيخ همام قال إيه عن تعدد الزوجات؟

- هتروح لمامتك الساعة كام يا حنفي.

حوار دسم جدًا

(أفكار مظلّظة)

دقّت الساعة معلنة بجزر أنها الثالثة عصرًا،
حلّق أفراد أسرة الأستاذ (حنفي) مدير عام مصنع الأناقة للغزل
والنسيج حول مائدة عامرة بما لذّ وطاب.
اقتربت زوجته المصون وهي تسير بخطواتها البطيئة وبين يديها
طبق كبير تكدس عليه ما لذّ وطاب من المحمر والمشمر.
مالت الأم وشغلت حيزًا كبيرًا من الفراغ، فمال أبنائها يمينًا
ويسارًا ليفسحوا لها الطريق لكي تضعه في وسط المائدة
وجلست مُحدثة رجّة هائلة فاهتز المرق واندلق بجياءٍ من
السلاطين المتأرجحة بدلال.

ودار حوار دسم جدًا:

بسم الله الرحمن الرحيم...بسم الله يا أبو محمد.

الله! ريحة برام الرز هايلا يا ماما

بالهنا والشفاء يا حبيبي...ما تتقليش علشان العريس اللي
جاي بالليل

أجابت (نوسة) وهي غاضبة بعد أن أمطرت المائدة بجبات
الأرز وهي تمضغ قطعة

اللحم التي أَلقت القبض عليها مدسوسة في البرام المعمر:

ليه هو أنا داخله امتحان .. اللي مش عاجبه ما يبصش.

ورفعت حاجبها الأيسر ثم أردفت قائلة:

-أنا كده زي القمر.

أشار الأستاذ حنفي إلى ابنته بربع الرغيف المتبقي في يده

بعد أن قضى على بقيته وهو ينقنق غارقاً في طبق الباذنجان

المخلل الذي تمددت أصابعه في خنوع وهي مستسلمة لنظرات

حنفي المفترسة وقال:

-بيقولوا عنده شقة يا نوسة، بس مش هايقدر يدفع مهر كبير

يا دوب الشبكة، بس والله شاب محترم ويعرف ربنا، وكم ان
شافك يا نوسة أكثر من مرة ومعجب بأخلاقك وحجابك.
رفعت أم محمد رأسها فجأة ونظرت إلى الجميع نظرة خاطفة
وشفطت الشورية من المعلقة شفطة لولبية محدثة صوتًا بديعًا
رنانًا وقالت:

كان نفسي يندفع لها مهر زي نوال بنت أخي، أمال إيه... هو
أنا بنتي شوية؟

ابتسمت نوسة بعد معركة جانبية مع ورك الفرخة المأسوف على
شبابها وقالت وهي ترفع يدها ممسكة ببقايا الدبوس قائلة:
أنا نفسي في فرح كل الناس تتكلم عليه، وعاوزاه في فندق
كبير، وعاوزه العريس شعره ناعم ويفرقه من النص ويوم
الخطوبة يلبس كرافته برتقاني لون فستاني اللي هايكون بديل.

ابتسم شقيقها محمد ابتسامة جانبية وقال بصوت خافت:

-دليل!!... هو أنت ناقصة؟

قامت نوسة بتوجيه ضربة حرّة مباشرة لصدر محمد، فاهتزت

المائدة، وتبادلت أصابع الكفّته نظرات الاستغاثة مع ورك

الفرخة واستمر الحوار...

لوح حمدي بالخيار التي استشهد نصفها على شفّتيه وقال:

-أنا باقول ما فيش لازمة للأوتيل والفرح والكلام الفارغ

وكفاية يكمل شقته وأهو تلبسي فستان أختك فيفي.. طالما الولد

صالح وتقي ويعرف ربنا.

ابتلعت نوسة ما في فمها ورفعت حاجبها وقالت:

-إشمعني أنا يا بابا؟وبعدين أنا لازم أخس النص علشان

ألبس فستان فيني أصلاً!

انتهر محمد الفرصة وقال:

بس أنت خسي وأنا أركبك ديل قصدي للفستان.

التفتت إليه موجهة ضربة ركنية لخد الأيسر فانهارت حلة

المحشي متعاطفة مع أمه، وتبادل حني مع زوجته

النظرات، وهنا قررت الأم أن تتناول أطراف الرغيف ..

أأ أقصد الحديث لكي تشرح لها عملياً...

فقامت بإدارة الديك الرومي ليكون أمامها مباشرة وغرست

السكين فيه وقالت وهي تعض بأسنانها العلوية على شفتها

السفلى:

-لازم نصبر عليه لحد ما يستوي، ونوطي النار.

أضاف الأب وهو يتناول طرف الرغيف الآخر :
-وبعدين ما نكترش فيه الملح لأحسن يتهري ويطفش...

وأكملت زوجته:

وبعد ما يستوي ويبقى في إيدينا ويسيب لنا نفسه
كده، نمسكه كده بالشوكة، ونقطع فيه زي ما احنا عاوزين،
وممكن كمان نحمره أو نشويه

سألته نوسة بخوف بعد أن أحست بتأنيب الضمير

-هو مين يا ماما؟

أجابتها ببساطة وهي تلوح بالسكين:

-الديك طبعا يا نوسة ...

ارتبكت نوسة وتأملت قطعة الديك الرومي التي رفعتها أمها على طرف السكين وألقتها في طبقها المستدير .. ونظرت إليها بحول شديد ... وتذكرت كيف يعود أبوها من عمله وعلامات الإجهاد على وجهه.

ثم التفتت إلى أخيها محمد وتذكرت كيف ينام على الأريكة وهو يشاهد التلفاز لمدة ربع ساعة ليتستيقظ على صوت الملعقة وهي تصطدم بكوب الشاي وأمّه تقلّب السكر.. ليتجرعها بسرعة وهي ساخنة، ليهول إلى عمله الآخر الذي لجأ إليه ليحاول إكمال ثمن مقدم شقة بسيطة مكونة من غرفتين وصالة ليخطب فتاة أحلامه فأزاحت الطبق وقامت وهي تمسح آثار الجريمة من على فمها وقالت:

ماما ... أنا خلاص هابتدي ريجيم من بكرة

بابا ..أنا موافقة على كل حاجة وكان هالبس فستان فيفي ...

بس يا رب أعرف أخس.

محمد يا أخويا، ألبس إيه النهاردة؟

رفع محمد رأسه ونظر إليها بحنان وقال:

أي حاجة من غير ديل ومش برتقاني ها تبقى حلوة ...

وعلى فكرة أنت مش طخينة قوي ده أنت زي العسل.

-يا بوسي يا بسبوسة

-أيوه يا ماما

طنط تهاني الخاطبة جت ومعاها صور شوية عرسان وأنت

تتفرجي وتنقي و تختاري.

- ازيك يا تونت

-أهلاً يا بوسي والله تونت طالعة من بقك زي العسل...خدي

شوفي كده على طول إيه رأيك في العريس ده...مهندس بتزول

وعنده 28 سنة واسمه تامر.

- لأ .. ده حواجه بتسلم على بعض .. مش عاجبني

- طب مايسلموا براحتهم...مش اخوات..

طب بلاش خدي ده دكتور أسنان وعنده ستة وعشرين

سنة واسمه وسيم.

- لأ ده رموشه قصيرة وعنده ودن أكبر نص مللي من

التانية...مش عاجبني

- طيب شوفي شوفي .. ده بقي مش هاتتكلمي ولا تنطقي ...

رامي ...

مدرس ألعاب..شعره سايح أهه والأوصة على جنب أهه سايحة

على عنيه

وممكن أكلمهولك يفرق لك شعره من النص يوم الخطوبة.

- لأ شكه بلدي وفلاح

- فلاح!

طيب استني شكك عاوزه عريس كده أستاذ ومهندس ...ما

فيش غيره

- هاتي يا تونت وأنا أتقي لوحدي.

- خدي يا ضنايا الصور كلها.

- ده كويس أبو عين خضرة ده صحيح شعره مففل شوية بس
مش مشكلة... اسمه إيه.

- زين ما اخترتي يا بوسي... اسمه جعلص أبو المناديل ده
دكتور بيطري قد الدنيا وغني ومؤدب وعيلتهم كبيرة قوي من
الشرقية.

- لالالا... مش عاوزه جعلص اسمه مش عاجبني.. أنا عاوزة
ده.

- وريني.. آآاه... معلش يا حبيبي ده خطب خلاص.

- طيب حاطه صورته ليه... طيب ده اسمه إيه؟

- بس ده الأستاذ حنفي.. طلباته مختلفة شوية يا بسبوسة
بلاش منه.

- ليه يعني يا تونت؟ ده حتى عادي جدًا وخدوده كبيرة.

عاوز واحدة شعرها أصفر وعنيها خضرة وصارخة الجمال
ومتفجرة الأنوثة.... مممم.. وأنت جمالك هادي ياختي ومش

بيصرخ.

طيب خلاص هاوافق تامر اللي حواجه إخوات بييجي
وأمرى لله هااستحمل منظره.

- طيب هاتي بقى بياناتك بالكامل استنى لما أطلع النوته.

- أكتبي يا تونت... أنا الحمد لله وما شاء الله عليه ربنا يحرسني
معايا ليسانس وباحضر الماستر

يا ساتر يا رب بتحضري!!! ليه يا بنتي... اللهم اجعل كلامنا

خفيف عليهم.

- وباحب القراءة والرسم على الزجاج.

- حلو وأهو تلوني الكاسات والكبايات.

- وعندي مدونة على الإنترنت

بأكتب خواطري ... وأكاونت على الفايستوك.

- وماله يا حبيبي هاتي كل اللي نفسك فيه... طيب بتعرفي
تطبخي؟

- طبعًا ومتابعة الشيف شرييني

- ولك في شغل البيت يا بسبوسة؟

- مم... بدأت يا تونت وعملت إمبراح لماما سندويتش جبنة
بطماطم.

- طماطم...!!

طب طلباتكم كده في الشبكة والمهر والحاجات دي إيه علشان
لو الباشمهندس تامر سأل.

- أنا متواضعة جدًا

واحنا هانسهل عليه كل حاجة ... شوفي يا تنتوتة

عاوزه شبكة ألباظ زي رهبام،

ومصري مايقاش أقل من سوزان،

والخطوبة تكون في فندق كبير زي هوايدا،

والفرح كمان زي إلبام،

وشهر العسل في تركيا زي علا،

وعاوزاه عنده عربية زي خطيب إبتسام.

-مين كل دول يا بوسي؟

-بنات عمي وخالي.

-اللا صحيح أنت اسمك الحقيقي إيه يا بوسي؟

-لازم يعني يا طنط

-أيون يا حبيبة تونت

-باتعة مصباح الشحات أبو نجمة .

-ومش عاجبك جعلص....عجبي!

19

سامح

سامح شاب طيب وبيدور على عروسة ..في يوم مامته

ندهت عليه:

- سامح سامح.

- أيوه يا ماما.

- طنط تهاني الخاطبة جت تعالى قول لها على مواصفات العروسة اللي نفسك فيها.

- إزيك يا طنط.

- بسم الله ما شاء الله إزيك يا سامح والله كبرت وعاوز عروسة.

- يا رب بقى ألاقى عروستي عندك ... لاحسن أنا دخت وتعبت من كتر العرايس اللي شفتمهم.

- يا رب ... ها قول يا حبيبي علشان أكتب .. استنى لما أطلع القلم والنوته.

- عاوز واحدة متفجرة الأنوثة.

- ليه بس يا بني ربنا يكفيننا شر الانفجارات.

- وعاوزها قنبلة كده لما تظهر في أي مكان.

- ليه بس ما تعقل يا بني واللإ إيه ... ماشي هاكتب

أهه .. أون .. ب ... له.

- وعاوزها شعرها حرير ويهفهف كده على خدودها زي
الشرارة اللي بتطلع لما الواد سيكو الميكانيكي بيشغل مكنة
اللحام.

- سهلة دي الكرياتين حلها يا سامح .. اللي بعده.

- تكون عينيها خضرة وواسعه ومدورة.

- هتحسدك يا بني بلاش مدورة دي .. هاكتب عينيها حلوة

وخلص.

- طيب .. بس اکتبي کمان إنها تكون مش قصيرة علشان

تعرف تنضف النجف وفوق الدولاب وكده.

- حاضر ... طويي ... يل ... ة .. زي راس .. ال .. عبد.

- وبقها صغير وبتعرف تحط روج.

- ما كلهم بيعرفوا هياكلوه يعني ... بقها ص .. غ .. بي .. ر.

- ومناخيرها رفيعة وتكون شايلة اللوز واللحمية ...

- لالا لا ... لازم تتنازل شوية يا بني الطلب ده كثير.

- خلاص مش مهم .. أمري لله.

- وإيه كمان.

- وعاوزها رقيقة وبتعرف تتكلم كده ومدردحة وفاهمه كل حاجه

مش قفل.

- وماله ... مد .. ر .. دحة.

- بس محترمة وبريئة وما بتطلعش منها العيبة وخام.

- مدردحة وخام يا سامح!

- آه.

- وفاهمه كل حاجه وبريئة يا بني!

- أيوه.

- ومتفجرة الأنوثة وبتفرقع يا حبيبي!

- أيوه يا طنط هو أنا ها اتجوز كام مرة يعني.

- كل يا سامح.

الملاطف سعد

في ناس لما تفضفض معاهم يعملوا كده... وخليني أوصف لكم أربع
مواقف:

(في أيام الامتحانات)

- الإمتحان قرب ونفسي أذاكر
- مش ها تلحق مافيش وقت
- أهو هحاول ألقط يمكن ربنا يكرمني
- ماينفمش أصلاً كان لازم تذاكر من أول السنة.

- أنا حليت وحش في الامتحان

- شفت مش قلتك طول عمرك فاشل

- أنا قلبي مقبوض

- بيتقى هاتسقط.

- أنا خايف

- لازم طبعا تخاف مافيش أمل.

....

"في الخلافات الزوجية"

- مراتي مدوخاني وكل شوية تغضب وتروح عند أهلها

- أنا لو منك أطلقها

- طب ليه بس أنا بحبها

- اتجوز عليها زيزي وأديها.

- لالا... هي بس ساعات بتتغندر عليه.

- ولع لها في العباية البرتقاني... واحرق قلبها على الطرح
الفسفوري.

- هي طيبة مش عاوز أجرحها بس المشكلة مامتها

- بص أول ما حباتك عينها تروح في النوم بلغ عنها وقول إنها
إرهابية.

- هي عارفة إن روعي في العيال وبتستغل كده

- اقتلهم واقهرها عليهم.

- مش قادر أعيش من غيرهم

- انتحر علشان تحسسها بالذنب .

.....

(في المرض)

- أنا رحت للدكتور

وحا أعمل عملية علشان لقي عندي (.....)

- ربنا يستر.

- مالك بتقولها كده؟

- لا مافيش بس.. ربنا يستر

طب قول لي هو إيه ال (.....) ده اللي ها يشيلهولي من

بطني.

- بلاش تعرف أحسن.. وربنا يستر

- طب يعني ها أموت واللا إيه؟

- كلنا حانوت و ربنا يستر.

- طب أنا خايف ومرعوب وركبي بتخبط على الجيران.

- بلاش تخبط عليهم بالليل و ربنا يستر.

.....

(عند شكوى الزوجة من زوجها)

- حاسة إن جوزي متغير من نحيتي

- يبقى إتجوز عليك فيني الرقاصة.

- بعد الشر..أنا اللي حاسة إنني مش زي زمان

- أصلك لظلظتي وبقيتي شبه فوزي.

- عندك حق أنا فعلا بقيت غريبة.

- وبقيتي كئيبة كمان وودانك قشفت ورموشك وقعت وعمودك

الفقري بيرقص مكارينا.

- بس دمي خفيف صح ؟

- مش واخدة بالي قوي.

- طب إيه رأيك ممكن أقص شعري زي ميسي مثلا أو أضرية

في الخلاط زي شيكابالا

- الخلاط اتحرق.

*طب هاعمل ريجيم زي بتوع الراجح الأكبر

- ولا راجح ولا فالج طول عمرك طخينة يا أمينة.

- طب هاشتري لبس الجديد.

- مش لما تخسي الأول!

- طب هاحاول أجدد حياتي وألبس له جيبة بكرانيش

- وتجدديها ليه مش لما تعرفي الأول هو اتجوز عليك واللا لأ.

- طب هو برده طيب وابن حلال

- متهيألك ده بياكل الفول بالمعلقة.

- ده احنا لنا ذكريات حلوة مع بعض

- بأمانة ما زعلك من سبع سنين كده وقال لك يا فاشلة لما
البامية اتحرقت.

- أنت بتفكريني ليه؟

- علشان تفوقي أنت لازم تسيبي البيت وتطلبي الطلاق ده
مش حاسس بيك.

"يا طيبين الناس دي بتبقى عاوزة بس حد يسمعها

كلام وبس

وبيكملوا حياتهم ثاني وهم فرحانين، اسمعوهم وقولوا كلمة حلوة."

21

عروسة المولد

البنات كده عرايس في مولد كبير

من أول ما تتولد

-مبروك يا أستاذ كمال اللي جاب لك يخلي لك وعقبال ما

تشوفها عروسة

-كلي يا حبيبي علشان تكبري وتلظلي وتبقي عروسة

- حبية تيته تعالي هاحكي لك حدوتة

ومش بتكون حلوة وملتوتة إلا لما يتجوزوا ويعيشوا في تبات
ونبات ويخلفوا صبيان وبنات.

وتبدأ البنات تكبر وترسم

(عروسة المولد)

وتشتري (عروسة) باري وتلبسها وتقلعها وتسرح لها وتلون

خدودها بالألوان الفلوماستر

وتخلع دراعاتها وتكسر دماغها.

وبعدها تتفرج على فساتين الزفاف والدبلة والطرحة وصور

المخطوبين وتحلم

واتبرمجي يا عنايات على كده

شغلتك في الحياة تبقي عروسة

اللبس والتفكير علشان كده والحلم في حدوتة واحدة بس

واحدة بس

ما فيش أي طموح ثاني!

يا بنوته

ما تخلّيش حلمك في الحياة عريس وبس

خليك أنت حلم كل الناس بتتمنى إنها تحقّقه

انجحي واعلمي إنجازات ومفاجآت خلي الناس تعرف إنك

موجودة وخليك شيء مميز

وقتها حتى لو العريس اتأخر مش هاتحسي بوجع ولا بفراغ

لأنك مش هاتكوني فاضية

لأن في فرحة ثانية وحلم ثاني ونجاح لسه بيكمل في حنة ثانية.

وقلبك عمران

مش هايدق على الفاضي.

22

وجع

كانت قاعده جنب جوزها في البلكونة وشايله بنتها القمر اللي
شبهها، سرحت شوية واكتشفت إنه بيص لواحد!

- عجبك؟

- مم .. بصراحة؟

- أيوه بصراحة.

- جميلة قوي.

- نفسك فيها؟

- بصراحة .. قوي.

- إيه اللي عجبك فيها أصلاً!

- عامله كده زي القشطة.

- طيب وإيه اللي مأخرك؟

- مش جاهز ماديا ... الموضوع موضوع فلوس بس.

- يا سلام! ومالك متأثر كده.

- خايف واحد غيري يخطفها مني.

بنتها عيطة ... قامت وطبطبت عليها ونيمتها وغطتها ورجعت

له ... ووقفت وحطت إيدها في وسطها وقالت:

- لو معاك فلوس ...

- من غير ما تكلمي مش هاستنى لحظة كفايه اللي أنا فيه ...

واللي شفته من يوم ما اتجوزنا

دمعت شوية وبلعت ريقها وتماسكت وبصت له بثبات, وقالت:

- ارضى باللي معاك واشكر ربنا.

- هو أنا اشتكيت ما أنا صابر أهه!!

- ربنا يرزقك الأحسن

- أصلا ما فيش أحلى منها.

- ليه يعني!

- ولا أحلى ولا أنصف ولا أروع ولا ...

- كفاية .. كفاية.

ودخلت وغابت شوية ورجعت بشبكتها وحطتها بين إيديه!!

- خد بيع شبكتي وخذ الفلوس.

- للدرجة دي!

- أيوه أنا بجبك أكثر من أي حاجة في الدنيا مش مهم الذهب
ولا الفلوس ولا أنا المهم تكون مبسوط وتحقق اللي نفسك فيه.

- تسلمي يا حبيبي .. بس بأقول استنى شوية يمكن الآقي

عربية تانية موديلها أشيك من دي واللا إيه.

- وماله يا حبيبي.

- طب شيلي الشبكة وهاتي شاي.

- حاضر.

23

أهلاً أهلاً بالزوار

عارفين لما جرس الباب يرن والولاد تجري وهي فرحانة وتقول
هيبه علشان في ضيف جاي..

في ضيوف تفرح؛

جميلة كده ومبهجة ومبتسمة وخفيفة وظريفة وبتيجي معاها
الفرحة وترتاح لما تشوفها وتتكلم معاها.

وفي ضيوف كئيبة؛

تيجي وتمشي تزود همك وقلبك يتقبض وأول ما يمشوا تقول
...الحمد لله.

على فكرة؛ في حاجات ما بناخدش بالننا منها:

حاول تتصل قبل الزيارة وتستاذن علشان يستعدوا -كلنا
بنحب يبقى شكلنا حلو قدام الضيوف -وأكد عليهم لو الوقت
مش مناسب يبقى بلاش.

(بدل ما تروح تخنقهم ولا أنت تنبسط ولا هم يفرحوا بيك)

البس حلو وخلي شكلك حلو واضحك

لو في أطفال في البيت فرحهم ولو بيونوناية حايجبوكي قوي.

(وهاتي لمامتهم شوكلاتة دي غلبانة برده)

لو رايج لزميلك ما تقفش في وش الباب علشان لو أخته الحلوة

فتحت ما تجرحش البيت.

(ولو مامته ما تدخلش رقبتك الطويلة وتقول فين محمد يا طنط

وتبعلق يمين وشمال)

بلاش تبقى زي المغص والصداع النصفي تكبس على نفس

الناس وتقعده سبع ساعات وتشتكي من كل حاجة وتكرههم في

الدنيا وأنت مكشر وقرفان.

بلاش تطب على الناس فجأة وهم مش محضرين أنفسهم

(الغسيل في الصلاة، الراجل ضارب مراته وعينها وارمة، بنتهم

جاي لها عريس ومتسشورة)

لما حد يقدم لك حاجة ما تتقرفش وتكرمش مناخيرك وكل

واشرب جبر خواطر.

(كتر خيرهم وبعدين ماله السحلب ما هو زي الفل)

ما تقعدش في كرسي كاشف البيت اختار مكان مستور
علشان البيوت عورة وأنت كمان يا حبيبتى بطلي تبصي هنا

وهناك

لما تروح تزور حد مريض خليك خفيف وقصر، دقائق وسيله

يرتاح وما تاخدش معاك ابنك اللي بيحب يفتش في الادراج

وبيموت في شرب البيبسي وتقعده تحكي له إزاي خطبت زيزي

هو بيكون تعبان ونفسه ينام وخصوصًا لو عامل عملية .

ما تروحيش لجارتك وترغي معاها الصبح وتحكي لها قصة
حياتك وهي لسه ما طبختش ولا سرحت شعرها وجوزها
يدخل وهي ناسية و قاعدة تتكلم مع حضرتك فيتخض من
منظرها وتجيهه جالطة سيديها تطبخ.

لو الشخصية اللي بتزورها بيتهم فيه إبتلاء بلاش نظام ... يا
عيني يا ختي يا ضنايا

الله يكون في عونك

جملك كبير معلش

(مش ناقصاك ما تزورهاش أحسن)

لو في امتحانات عند الولاد الغي الزيارة لأن أهمهم في الوقت ده
تجوز عليها الصدقة

ويا ريت جوزك يخرج مع جوزها اليومين دول لأنه في خطر
والجيران لبعضهم.

في ناس مش بتحب حد يدخل بيتها بالجزم وبيتأذوا جدا جدا
بلاش تضايقوهم واقلعوها لما تدخلوا جنب الباب

(وخصوصا لو الدنيا بتمطر وبتحبوا تلعبوا في المائة)

لو ولادك يلعبوا مع ولاد الناس اللي بتزورهم لازم قبل ما
تمشي تخليهم يلعبوا اللعب ويرتبوا المكان

علشان هاتدعي عليك وهي بتلمهم لعبة لعبة.

مش لازم تعلقني على كل حاجة في البيت

هي الكنبه دي مش كانت هناك، أنت نقلتي السرير هنا ليه؟

وجبتي السجادة دي امتي وبكام؟

أنت رايحة تزورها مش تحققي معاها.

بلاش تقوليها الكلام اللي يجرح ...

مالك خاسة و وشك أصفر كده!

أنت طختي كده ليه!

مالك متبهدة كده!

ما هي كانت بتطبخ من إمبراح طبيعي تبقى فظيعة ...

وأنت كمان يا فظيعة ... عارفة إنك زهقتي منها لأن الزيارة

طولت بس ما فيش داعي تصرخي كثير وتلطشي في العيال

وتشدي شعر بنتك وتهبشي ابنك كل ما يعدي علشان

الضيف بيتكسف ويبقى حاسس إنه السبب.

(تعبانة ما تعزميش حد)

أحلى حاجة الستات تقعد مع بعض في مكان والرجالة في مكان
تاني علشان كله ياخذ راحته ولما تضحكي مع صاحباتك زميل
جوزك وجارم ما يسمعوش ضحكك ويتسرعوا .

لو أنت المعزومة كلي ...

كلي حتى لو الأكل محروق

حرام عليك يا مفترية

دي طول النهار واقفة على رجليها ونكدت على جوزها علشان

العزومة وسنينها

وما تعمليش رقيقة ومش قادرة ومعدتشي مليانة

عارفينك وفأسينك.

وأخيراً

خدوا نية لأننا بننساها

(عيادة مريض، إدخال سرور على مسلم، حب في الله)

24

بنت ناس

أصلها أرسقراطية ضحكتها شيك وبتحط إيديها على بقها

(مش كررر هقهقهق ولوزها بتترعش)

مش بتتكلم وهي بتاكل وبتضغ وهي قافلة بقها

بتاكل البيتزا بالشوكة والسكينة

(مش بتضربها مثلثات زي ناس)

لسانها معوج وبتنطق الحروف برقة

بتقول مش رحت..مش أكلت ...مش عرفت

بتقول ميرسي

(مش متشكرين يا عم الحج)

باااي

(مش سلامو عليكو)

وبتقول زي ما بأقول لحضرتك يا تااونت

(مش زي مبولك كده يا طاانط)

بتتعد على طراطيف الكرسي وبتسلم بضوافرها.

مش بتعرف يعني إيه تقلية وفتة وبرايم ويااي بقى.

بتفطر كورن فليكس

(مش سندوتشات الفول)

مش بتاكل رنجة وفسيح

(فاتها نص عمرها)

عمرها ما نضفت ولا سمك ولا فراخ

(في دي يا بختها)

كل شنطها من عند

Abo Nesma

(ماركة وكده)

والشوزات من عند

Happy gazma

(دي جزم فرحانة و بتمشي لوحدها)

جدها أصله تركي وجدتها جبنة تركي

خال مامتها عنده فيلا على ترعة المحمودية

(وفي معدية ...أأأأ...قصدي لانش)

دي مواصفات بنات الناس حسب تقييم الناس

على فكرة

المحبة المحترمة المتزينة اللي بتمشي زي الملاك وما تحسش بيها

برده بنت ناس

واللي بتغض بصرها مش علشانك..علشان ربنا..برده بنت ناس

واللي بتغير طريقها وتمشي من طريق أطول علشان ما تعديش

على قهوة...برده بنت ناس

واللي ساكنة في بيت بسيط ولبسها بسيط وما تعرفش

ماركات...برده بنت ناس

واللي بتاكل فول وطعمية وشاطرة في التقلية بنت ناس

واللي بتتكعبل في عبايتها علشان طويلا وجزمتها كوتشي ... برده

بنت ناس

واللي ما بتعرفش فرنساوي وبتقول شكرا ومتشكرين.. برده

بنت ناس.

وسلامو عليكو.

مشية الستات

للاستات أكثر من مشية عارفينهم؟

مشية البطة المرحة

ودي لما الست من دول بتلبس كعب عالي وهي هلامية حبتين
وغالبا الجيبة أو الفستان بجزام فيه سلاسل وفيونكات
وبتحصل زلازل وبراكين واهتزازات زي عروض فرقة الفنون
الشعبية كده.

وألف مبروك

مشية العسكري

دي بنوتة طيبة بس هي نجولة جدا هاتلاقوها مندفة ومايشة
بسرة وحاضنة الكتب ولايسة كوتشي وما بترجعش لورا

ومخضوضه وبتبرق وبتبص حوالها كثير زي المدمنين ودي غالبا
بتقع وبتتكعبل في رباط الجزمة

وعندها إصابات كثير.

وألف سلامة

مشية البجعة

ودي أعراضها بتظهر لما البنت بتلبس جزمة الباليرينا الفلات
دي بتاعة البالية ووقتها بتكون مقتنعة إنها بجعة من اللي بيغرقوا
في بحيرة البجع ما تقلقوش وسييوها تعدي الشارع حتى لو على
طراطيف صوابعها ولما توصل سققولها.

وربنا يهدي

مشية البرنسية

ودي سايحة ...أأأ...قصدي عندها إحساس إنها من السياح
وبتتفرج على الناس في الشارع كأنهم تحف وآثار فرعونية
وبتشيل شنطة إيديها قصيرة وتعلقها في ذراعها، وبتلبس كعب
عالي جدا ونضارة شمس وعقد كبير أد كده على صدرها وبتعقد
الطرحة زي ماجدة في الأفلام بتاعة زمان

وربنا يشفي

مشية بنت الدايجة

مش عارفة ليه بيقولوا على الست الوالدة كده رغم إن هي اللي
دايجة مش مامتها

ودي أصلاً سرحانة و بتمشي على مهلها في خطوط لولبية غير
مستقيمة ورجليها بتلف على بعضها وبتتفرج على كل الفتارين
والمحلات وفي الآخر مش بتشتري حاجة.

وربنا على الظالم والمفتري

مشية المثلث

ودي ثنائية غالبا بيكونوا أختين

أو بنتين أصحاب أوي

هاتلاقيهم ماشيين لازقين راسهم في بعض ودي راس المثلث

وجيياتهم أو العبايات نازلة على واسع ودي قاعدة المثلث

والأقصر منهم متشعلقة في ذراع الطويلة وكل شوية يتوشوشو

ويضحكوا

ولو لابسين كعب عالي بيعملوا دوشة

ولو لابسين فلات.. الطويلة منهم بتتكبل في القصيرة ويقعوا

سوا

اعترفي وقولي أنت بتمشي إزاي .

26

الشاويش عطية

على فكرة مش شاويش ولا عطية ولا غير ..إنها جميلة
وبنوته..

وما بينكدش على البنات إلا الكلمتين دول
البسي يا حبيبي كده وأنت خارجة وحتي في وشك حاجة
طول ما أنت عاملة كدة ما حدش هايصلك
ومش ها تتجوزي وقصري الطرحة دي
ولو البنت فتحت بقها وقالت كلمة

يقولوا لها خليكي قاعدة وخلي الحجاب ينفعك!

كل الشباب والرجالة ما يبجوش المقفلة.. يا مقفلة

والمشكلة إن في شباب بيسمع ويبعمم وخلص ويبقى محترم

ويقول لك أنا عاوز عروسة فاهمة

بلاش المقفلة قوي دي

لا هي مش مقفلة أنتوا اللي مش فاهمينها !

مش معنى إنها بتخرج بالحجاب أو النقاب قدام الشباب

الغرب تبقى غفير.

مش مخبية جوز فراخ تحت العباية على فكرة ومافيش أراب

مش معنى إن طرحتها طويلة ومش بتحط ماكياج ولا بسه

جواتي تبقى شاويش.

مش معنى إن طرحتها عادية ولبسها بسيط تبقى ما عندهاش
أنوثة.

مش معنى إنها جدعة وبتعتمد على نفسها تبقى راجل.

مش معنى إنها واثقة في نفسها تبقى غفيرة.

لو شديت ودنها حاتسقف زي البنات الجمال اللي ماشيين في
الشارع .

ولو خبطتها على مناخيرها هاتغني

ولو كعبلتها هاتخط مونوكير

ولو شديتها من خدودها هاتضحك

ولو شافت الروح ها تأكله أأأ ... قصدي عارفه إنه بيتحط

على الشفايف

وعندها جيبة والله وفتان بكرانيش

وبتسرح شعرها كل سنة مرة الحمد لله بعد ما تستحمى في

العيد الكبير

عارفة الفرق بين البارفان والجلانس

وعارفة إن البيروسول مش مزيل عرق

عارفة المودة...أو الموضة

بتحب اللون البنك

(كل البنات بتحبه مش عارفة ليه)

بتحب القطط والدابايب

(وبتشترى ماديليات وسلاسل وعقود كتير)

بترسم ورد وهي بتذاكر وخطها منيل

بتقرأ شعر

(هي مش فاهماه بس بتحاول)

إيديها أصغر من إيديك ورقيقة

زيها زي البنات الروشين ويمكن أحلى كمان،

بترقص مع البنات صاحباتها وبتسقف وتغني بس لما بيكونوا في

البيت

نفسها تعيش

هي بس عارفة إن نظرة رضا من ربنا أحسن من

مليون نظرة إعجاب من الشباب اللي في

الشارع.

ساترة نفسها ومحافضة على الأمانة ويوم ما تكون زوجة هاينزل

القمر ويغسل المواعين و ينور في البيت.

مش لازم تلبس بنطلون وتعمل لنا إنهار في الشارع
مش لازم وهي خارجة تطلع نص شعرها من الطرحة وترسم
عينها زي كيلوباترا علشان تبقى بنوتة

مش لازم تلبس إكسسوار كإن حنطور ماشي في الشارع
علشان تلفت نظرك

هي ممكن تمشي وما تحسش بيها لإنها مستورة
والله بنوتة

بلاش تظلموها.

بتحترار شوية

ساعات بتسأل وتعرف عنه غلطة

تقوم تتعقد من كل البنات أو كل الشباب

غلطة!

في ناس بتغلط بس ما تقدرش نعم الغلط علشان إنسان واحد

(ملتزم ظاهرًا) غلط غلطة

وبياكل والعياذ بالله ترمس في الشارع

ويشرب استغفر الله العظيم يا رب فاتنا بالتفاح

أو أخت محجة أو منتقبة استغفر الله العظيم بتاكل جيلي كولا

يبقى كل الملتزمين كده.

لأ طبعًا

على فكرة بقى

مافيش عريس متدين 100% لدرجة إنه بيطلع نور من ودانه

وما فيش عروسة متدينة لدرجة إن مناخيرها بتنور

(بغض النظر عن إن دماغها بينور بالطرحة الفسفوري ...)

ومش كل شاب بدقن بيتقى ملاك من السما..

ممكن يكون بوشين واحد بدقن والثاني لأ

بس في منهم فعلا ناس زي سيدنا يوسف وزبي الفل

ومش كل اللي لابسة نقاب أو طرحة طويلة ملاك ...

ممكن تكون شريرة وبتغتاب الناس.

(وفي منهم بنات عسل زي بنات شعيب كده وزبي القمر

وفي ناس مش متدينة بس بتحبهم

التدين مش ببيان قوي ومالوش لون ولا ريحة

التدين مش بيتقاس بالمتر ولا بالكيلو

الإيمان إحساس جواه

ها تشوفيه إزاي؟

وهو لابس القميص الكاروهات الأخضر وقافل زراير الجاكت

البنّي وفارق شعره من النص!

الخشوع جواها

ها تتفرج عليه إزاي من وراء الحجاب!

يبقى لازم نعرف كده من الأول

مافيش حد مثالي

الغلط مش عام

أنت مش ملاك وكمان هو مش ملاك وماحدثش يطير

بجناحات وقت السحر الخشوع جواكم.

كل واحد فينا جواه خير

ونفسه ربنا يحبه

في أساسيات دي اللي ندور عليها..

(طول شعرها مثلا ومناخيرها صفرة وشعرها أخضر)

وهو فلسفه ومرتبہ..كده یعنی)
یووہآآآ..قصدي...الأساسيات

الحوار مهم مرة واثنين
والخطوبة أصلا علشان كده.

أحسن حاجه لما تروح تخطب ولما يجيلك عريس تبقى طبيعي
تتكلم بصراحة وبوضوح

وتسأل سؤال بريء وتشوف رد فعل اللي قدامك
مش عارف تتكلم قول له أنا مش محضر كلام لو حابب تسألني
عن أي حاجة

وكل ما يسألك أو تسألك تحاوب وتقول طيب وأنت ؟
وتقلب السؤال عليه

سمعة الانسان بتفضحه وتسبقه لو كان صالح بيتعرف رغم أنه
ها يشوفوه في المسجد

وعمره ما عاكس يارة

وصحابه عارفين إنه مش بيتفرج على تفيدة وهي بترقص

ولو كان خبيث ها تلاقي الناس كاشفاه مثلا

شافوه وهو بيقرز لب في البلكونة

وكمان شافوه أكثر من مرة وهو بيضرب سندوتشات الطعمية

ومخلص فلوسه عليها وآثار الإدمان باينه على خدوده و ووشه.

لازم تسألوا عليه

ما ترفضيهوش علشان مش ملتحي رغم إنه حافظ نصف القرآن

ومصلي وبار بوالديه.

وما ترفضهاش علشان طرحتها عادية رغم إنها لابسه عباية

واسعة وبنغطس وندور في كم العباية علشان نسلم عليها

الأخلاق مهمة قوي

الدين كله خلق فمن فاقك في الخلق فاقك في الدين.

28

نوع نادر جدًا

في نوع نادر من البنات

يبقى عندها إحساس إن أهل العريس فلا حين ومش مودرن

وإن أهلها من طبقة أرقى

وبتبقى هي واخواتها البنات أو صاحباتها عاملين كده :

شفتي يقولوا على البارفيوم بارفان..ههههه

(أنتوا الاتنين غلط أصلا اسمها كولونيا)

الحقوا دول جايين جاتو هو مش المفروض بومبونيرة فضة

وفيه شوكولااا

وتزعل قوي لو خطيها مش عارف

الباتاكور..والشميز..والتونيك..وال

#\$@/&&* .

وتبص له شذرا لو قال شكرا يا طنط

(أصلها بتقول لمامته ميرسي يا توانت)

وتنكد عليه لو ما جابش لمامتها فارة كروازينية في يوم الأم

(وممكن تقتله لو جابلها شال صوف)

وتقعد تنتقده وتقول له قول كده وما تقولش كده وهات دي

كده وماتعملش مناخيرك كده واشرب كده.

ولو حماتها سألها تحبي تاكلي إيه يا ضنايا أعملهولك على الغدا

تطلب بيكاتا بالشاميين وساليزون وباستا
وهي مش عارفه اللازانيا دي مرهم واللا شتية
ولما تزورهم بتعيش في دور الأميرة واخواتها الأقسام السبعة
أو بنت السلطان اللي جاية من مملكة الكرانيش
وتمشي على طراطيف صوابها جوه الجزمة
وتشرب المية بالشوكة والسكينة

يابنات

ما تصعبوهاش كده وخليها سهلة

دول ناس طيبين

وأهله دول هم اللي ربوه وكبروه لحد ما جه وخطبك وعجبك.

المجد للبنات اللي مش بيعملوا كده

29

نصائح لأم العريس

ابنك رايح يخطب ألف مبروك
دي شوية نصائح من واقع كلام البنات والستات
والصراحة هم أواريب وبيأخدوا بالهم من حاجات عجيبة

شوفي

قولي لابنك ما يفرقش شعره من النص
لو هو متابع مسلسل فاطمة وكريم ومنك لله يا ظالمة
أنت السبب ليه قلتيله إن شعره ناعم

(البنات بتحب العريس اللي مظهره فيه رجوله بلاش الشعر

المسبب وبلاش يتسشور.)

ركزي على الشراب

لو لقيتي الفردتين مش لون واحد

يبقى ابنك عنده عمى ألوان هاتيله فردتين لون بعض ...

البنات بتبص للشراب ولازم يكون لايق على البنطلون
والقميص.

(الشيأة مهمة)

لو لابس حفاظة وحاطط جل في شعرة وفاكر نفسه أحمد

حلمي في الفيلم..

بلاش تكسفي نفسك واهري

(استني عليه سنتين لحد ما يعقل الأول)

قوليه لما يقدمواه كيك أو جاتوه ما ياكلهمش كلهم

وابقي هاتيله وأنتوا مروحين ...

(البنات بتستنى اللحظة دي وها تتفرج عليه وها تحكي

لصاحباتها في التليفون..أواريب أواريب)

خليه ما يتفسحش بعنيه في الصالون والستارة

والبراويز والسجاجيد وهو بيكلمها..عيب...عيب.

(وبطلي أنت كمان)

واستنوا لما يقوموا يجيبوا العصير واتفرجوا بسرعة

لازم يقص ضوافره

لأنهم بياخدوا بالهم منها ولازم يكون نضيف وظريف ولطيف

ويحط بارفان ويلمع الجزمة.

(بلاش الكوتشي وبلاش الصنادل)

(ولو لبس شبشب بصباغ مش ها توافق)

خدوا في إيديكم حاجه

كيس جوافه سبت برتقان.. كيلو شوكلاته أو تورتاية

(لو ما جبتيش ها تقول عليه بخيل وها تمسكهاله وتذله بيها

طول عمرهم)

مش لازم بدلة وكرفته هي مش ناقصة خنقة خليه يلبس قميص

ويا ريت يكون مكوي

وبلاش النظارة الشمس

أنتوا أصلاً رايجين بالليل.

مش طول ما أنت قاعدة تشكري فيه كده كده مش ها
يصدقوكي علشان أنت مامته ما تتعبيش نفسك.
(ووفري صحتك واشربي العصير وأنت ساكته)

لو اخدتوا معاد ما تلغيهوش

ولا تأجله لأن بيكون في طواريء في البيت

والبنت بتبقى قاعدة بالهدوم من قبلها بتلت أيام والجزمة بكعب
عالي وضيقه ها يدعوا عليك وعليه.

(اتصلي بالتليفون قبلها واستأذني بذوق)

بلاش تقوليلهم إنه كان بينادي على سوپر مان من الشباك وهو

صغير

وما تحكيش على اليوم اللي تاه فيه في البحر.

(هي كمان بتاكل المشابك وتاهت في حديقة الحيوانات

ولقوها جنب الزرافة مش كل الذكريات تتحكي لأنه بيتحرج و
كلنا بنغلط)

ماتلبس يش كل الذهب اللي عندك وتستلني غوايش أختك
لان لو طلبوا حاجه بعد كده وقولتوا الظروف ما تسمحش
هايفكروك بالغوايش وهي أصلا مش بتاعتك

(ما تتصنعوش وخليكوا على طبيعتكم والصراحة في الماديات
أحسن علشان تبقى عارفه البير وغطاه).

ماتأخديش معاك حفيدتك بنت بنتك وأول أحفادك... علشان
البنات فاقسين الموضوع ده

(ها تشرب البيبي وقال إيه عاوزه أعمل بيبي يا تيته وأنت
ها تقولي أصل ما بتدخلش الحمام مع حد غريب وهاتقومي
وتتفرجي على الشقة.. فاهمينك يا أروبة)

لو قابلوكم كويس والبنت وأنت ماشية خدتك بالحضن
وباستك من هنا ومن هناك يبقى دي علامة يا مارد

وفي قبول.

ألف مبروك

30

(لظلوظه المملظظه)

خليك كده.. طول النهار في المطبخ ما بتفكريش غير في الأكل

وبس

من صينية البطاطس باللحمة الضاني لطاجن الرز المعمر ويا

جماله يا حركاته يا تكاته

واللا البيتشيفور اللي بتعمليه

كفاية فرجة على قناة الطبخ وبطلتي تدعي وأنت ساجدة
للشيف فلان

مش هو اللي ها ينقذ حياتك على فكرة.

ما تتصليش بيه في رمضان وتقولي له

(بحبك في الله يا شيف)

مش لازم تحكي لجوزك الفرخة بتتنضف إزاي ...

بلاش تقشري البطاطس وتقمعي البامية وأنتوا بتتفرجوا على

التليفزيون

اعملي كل حاجة الصبح وهو في الشغل يا لظلظ

هو مش عاوز يعرف أم محمد جارتكم بتعمل القلقاس بسلق

واللا بالكزبرة الخضرة

حاولي تبصي في المرايه قبل ما تجيبي المسلسل التركي وهو
قاعد وخدي بالك من المذيعات لو لقتيها حلوة خدي الريموت
وغيري وقولي زهقنا من السياسة

بلاش أول ما يدخل الشقه تروحي رازعاه معلقة مربى

علشان سُكرك يا حبيبي....خلاص كره المربى.

صحيح لازم يكون طبيخك حلو بس مش طبيخك بس اللي
يبقى حلو

ما تسألهموش كل يوم السؤال اللي مدوخ كل الستات.. أطبخ
إيه بكرة أنت صاحبة القرار ويا خوفي من قراراتك

بطلي تسيطر على تفكيره بحلة المحشي

(كل يا خويا بالهنا والشفأ أنت تشيعيت طول النهار)

اتعلمي تتكلمي وتقولي رأيك وتثبتي شخصيتك

ما تشوشيش أفكاره بطبق الفتة و تهمني على نظراته بحتة
الكنافة

وبعدين تسأليه ببراءة وأنت بتقلبي كوباية الشاي

(مالك ساكت كده يا خويا مش بتكلمني ليه)

هو بيكون سامعك كويس بس الأكل كابس على نفسه

حا يزهدق يا لظلظ

وحا يكرهك يا حبيبي ويمكن نفسه تهفه على طبيخ واحدة

تانية

نفسه في شوية رومانسية

وأنت غرقانة في التقلية

حاولي تقري كتاب وتثتقي شوية واتفرجي على برامج إجتماعية

الدنيا مش مطبخ وأكل وبس

وعلشان خاطري

ما تتصليش بالشيف اللي بيطلع في التلفزيون .

31

لما يجيلك عريس

يا بنوته..لما يجي لك عريس...ما تستخيش ورا المكياج خليه

يشوفك على حقيقتك ويتصدم

أااا..قصدي يعجب بطبيعتك، و ما تلونيش خدودك وما

تلبسيش خلق أنت كده بطبيعتك من أجمل ما خلق

البي فستان أو عباية.. الشاب الغلبان من دول يتخيلك في
أحلامه بستان طويل بمبي وديلة واسع وزبي الأميرة مش
بنطلون بركب

(البنطلون اللي بركب مافيهوش ريحة الأنوثة وبعدين ما ينفعش
أصلاً مع الحجاب)

بلاش كعب عالي قوي لاحسن تتكعبي وأنت شايله صينية
العصير ويقع على دماغه ها يمشي

خليك على طبيعتك وبلاش تتصنعي الرقة في الكلام

بلاش أنت (كررت) تعمل إيه اسمها (قررت)..

وبلاش (الاستكرار) اسمه (الاستقرار)

علشان ها يتصدم لما تتكلموا عن (الواقع) قصدي (الواقع)

اتكلمي بالراحة وهدوء ما حدش بيجري وراكي
الضحك بحساب وما تخبيش سنانك وبوك كل ما تضحكي
(أنت جميلة ولو مش عاجبه مع السلامة)
لما تكلمي مامتك قدامه ما تبرقيلهاش وتكزي على سنانك
(ها ياخذ باله ويخاف ويهرب)

حاولي تسمعي له

(إديله فرصة يقول كلمتين على بعض منك لله يا رغبة يا
مفترية)

لما تقدي له حاجة ما تراقبيهوش

سيبيه ياكل وما تركزيش وهو يبيلع.. لأحسن يزور ويموت
...عيب.

لو حضرتي درسين فقه ودرسين تجويد ما تعقديهوش وتطلعي

عينه ..مش وقته

ما تحسسيهوش إنك المفتش كرومبو

هو مش جاي تحققي معاه..خليك ذكية في الحوار مش مهم

تعرفي كل حاجه من أول زيارة

خلي بابا يسأل عنه

لو عريس حلو ومتدين وممتاز ما تتغريش بالمظهر ودوري على

عيب فيه تذليه بيه مستقبلاً...أأأ..قصدي مافيش حد كامل

...يووووه بقي قصدي ما تنهريش قوي ويغمن عليك وتنشكحي

فيان عليك فيكرهك وتطفشيه

(اتقلي أنت كمان زي الفل..خليك منضبطة

ما تبقيش مغرورة وتتكلمي من طراطيف مناخيرك وتتكبري
عليه لو هو بسيط

بلاش تتعاركي مع أخوك حماده قدامه استني لما يمشي واعجنيه
مع أختك الثانية

لو لابس حفاظة وشعره سبايكي ما تكمليش قومي اغسلي
المواعين وروحي نامي

لو اسمه حنفي أو عباس أو من عيلة أبو سحلول ما ترفضيهوش
من قبل ما ييجي ممكن يكون أحسن من اللي بتحلمي بيه.

ما ترفضيش شاب طخين أو أصلع أو بشنب أو أسمر أو صباع
رجله الصغير معوج أو خرمين مناخيره مش قد بعض علشان
السبب ده بس... لازم تقعدي وتتكلمي معاه لأنه بني آدم يمكن

يكون في قبول ويكون الإنسان اللي يسعدك رغم أنه
...قصدي أنك

ما ترفضيش شاب محترم ومتدين علشان

ما عندوش شقه خمس أوض وصالتين وحمام دورين

أصلا كفاية الحمام الدورين

مش لازم عربية

(ممكن يكون عنده عربية وما عندوش أخلاق..تختاري إيه؟)

مش لازم تعملوا الفرخ في فندق خمس نجوم

(الناس ما بيعجبهاش مهما عملتي وها يقعدوا يعاييوا على

فستانك...ماله بيت بابا وماله السطوح ده حتى طراوه .

مش لازم عملي زي حسنية بنت عمك بالظبط كل واحد وله

ظروفه وجواباته واختياراته.

مافيش فارس أحلام حقيقي زي اللي في خيالك وما عندوش
قصر ومافيش حصان أبيض ومافيش مملكة وغالبًا ما بيحفظوش
شعر..وما عندوش سيف ومش بيحارب..

والله ما هايخطفك

آه والله آه والله آه والله

32

ست العرايس

مش لازم

مش لازم تشتري مية وخمسين فوطه وش

وأربعين طقم سرير

وعشر كوفيرتات

وعشر بطاطين

وست لحفة فاير.

أصلا مش هاتستخدي غير اتنين تلاته .

مش لازم 24 كباية شاي شكل بعض

و24 كباية مية شبه بعض

والكاسات اللي بترقص في الضوء لوحدها

والكبايات أم حرف ذهبي

والكبايات اللي بقها معوج

والصينية أم رجلين

وحامل الكنكة !
وغطاء الطشطشة!

ومش لازم طقم الشربات اللي مالوش لازمة وأصلًا ما حدش
بيعمل شربات.

مش لازم جميع مقاسات الحلل الألومنيوم والتيفال والطاسات
والصواني اختاري اللي حا تستخدميه بس أنت مش مهاجرة
ومسافرة موزمبيق لما تحتاجي ثاني إبقى اشترى.

مش لازم حلل بايريكس وفيزون وسيراميك و#\$^&&@

مش لازم الشمعدانين والساعة اللي بيتحطوا على النيش من
أول الجواز هاتوهم حين ميسرة.

ساعة الحيط اللي بتعمل دينج دونج مش ضرورية عرفوا
أصحابكم وقرايكم محتاجين إيه وهم يجيبوها هدية.

عادي لو إتجوزتوا من غير ما تجيبوا الكاسيت الديجيتال أو أبو
ساعات كبيرة والميكروفون.

مش لازم غرفة الأطفال من البداية وممكن تسيبوا غرفه فاضيه
وتقفلوا بابها إيه يعني ولو الضيوف سألوا قولوا لهم دي أوضة
الفيضان.

ما تروحيش مع مامتك لبتاع البلاستيكات لأنه هايبيع لكم كل
المحل والحاجات مغرية..هاتي الضروري ورتبي أولوياتك.

مش لازم طقم الصيني

(الأساسي)

والأركوبال

(الإحتياطي)

و الطقم الفاميه

(للمعارف)

والميلامين

(للاستخدام اليومي)

ركزي على الصيني وحاجات بسيطة للاستعمال اليومي.

مش لازم تشتري طن مكياج و4 كيلو بارفان وكرتونة

إكسسوارات وجردل مونوكير إرحمي بابا وماما شوية.

مش لازم تفصلي دستتين فساتين

وتشتري دسطة بيجامات شتوي

ودسطة صيفي

وشباشب وبقايب

وشنط وصنادل وكوتشيات

وشوية عبايات

أصلا وزنك حا يزيد ممكن حاه بسيطة أو حا تضري خالص
ف خسارة الهدوم استني شوية.

بلاش طرح كتير.

بلاش مفارش مالهاش لازمة.

مش لازم حفلة في الخطوبة و حفلة في الشبكة و حفلة في كتب
الكتاب و حفلة في الزفاف ...خلي كله عائلي و الحفلة واجتماع
الناس يوم الزفاف.

مش لازم كل الهدوم تبقى جديدة خدي هدومك القديمة معاك
ما حدش ها يحاسبك.

مش لازم تفتحي الدولار والنيش وكل حاجه والناس تتفرج
وتعرف كل حاجه عندك وتطلع تحكي بره دي خصوصيات
وعادة سيئة عاوزين نبطل نعملها.

اعرفي ظروف والدك المادية

أو مامتك لو هي اللي بتصرف في حالة وفاته

وحطي حدود

واكتبي بالورقة والقلم ورتبي الأولويات

في حاجات لازم تشتريها تبقى أولويات.

وفي حاجات ممكن تأجلها

وفي حاجات ممكن تتلغي خالص.

وخصوصًا لو لك إخوات أصغر منك.

إرحمهم وخليك عاقلة

وارحمي عريسك برده وتوافقي معاه على حاجات الشقة
واختاروا المتوسط سعره وإرضي ووافقي حسب ظروفه لأن
وراه حاجات كثير

33

هؤلاء مروا من هنا

في بيت كان دافئ قبل أن تنير شاشات الحاسوب

وفي بيوت كانت تعشش عليها أطيار السعادة قبل أن يحدث
الآتي...

مر من هنا

هي:محمد

هو:نعم

هي:هاتيحي تتفرج معايه على التلفزيون

هو:حاضر بس أقرأ الإيميل وجاي..وبعدين ما أنا قريب أهه

افتحي بس واتفرجي وأنا متابع معاك

هي:إيه رأيك؟

هو: في إيه

هي: في الموضوع اللي اتكلمت عنه فوزية السباعوي

هو: معلىش كنت مركز في اللي بأقراه... قوليلي مختصر

هي: كانت بتتكلم عن (....).... إيه رأيك

هو: آه عندها حق

هي: إيه!!! يعني أنا حيوان أليف!

هو: إيه أنا قلت كده!

هي: ما هي قالت إن الستات اللي قاعدين في البيوت دول زي

الحيوانات الأليفة تاكل وتشرب وبس

هو: لأ طبعا انت ست الستات

هي: ربنا يخليك.. هو انت بتقرأ إيه؟

هو: مواضيع ظريفه جدا

هي: طيب أنا عاوزه أتعلم أدخل على الإنترنت أهو أقرأ شويه
وأسلي نفسي

هو: ليه... هو انت عندك وقت؟

هي: أصلي بأزهد وكم انت دايما مشغول عني بالنت ومش
بتتكلم معايه

هو: ليه بس ما أنا معاك أهه... وبعدين بلاش إختلاط على
النت... ده مليون بلاوي

هي: بس...

هو: لأ... بلاش إنترنت

وفي تلك اللحظة كان يكتب ردا على صديقة له كتبت منذ
لحظات:

(أنا زهقانة) أراد أن يخفف عنها وبدأ يكتب بينما كانت زوجته
تفرك يديها أمام شاشة التلفاز وقد ظهرت على وجهها علامات
الألم وقالت بصوت واهن

هي: محمد... أنا زهقانه.. ومخنوقه... تعالى اتكلم معايه شويه
هو: طيب بس أخلص أصلي باكتب في موضوع مهم

.....

مرت من هنا

هي: يا حماده

حماده: أيوه يا ماما

هي: جعت؟

حماده: قلت لحضرتك أربع مرات عاوز أكل قلتيلي لحظة

هي: حاضر يا حبيبي أنا قايمه أهه بس ما تجيش ناحية

الكومبيوتر

حماده: حاضر

وبسرعة أعدت له الطعام وعادت للحاسوب

هي: خد يا حبيبي

حماده: ماما بابا ها ييجي امتي؟

هي: شش.. ما تكلمنيش وأنا بأكتب

حماده: حاضر....ممكن ألعب بلاي ستيشن

هي:روح روح

.....

مر من هنا

الأم: تك تك تك...يا أسامه

أسامة: أيوه يا ماما

الأم: إصحي يا بني..طول النهار نائم

أسامة: يا ماما ما أنا كنت سهران طول الليل

الأم: طب قوم أقعد معانا شويه

أسامة: يا ماما عاوز أنام....حرام أنام يعني

الأم: خلاص يا حبيبي...نام

أذن العصر

الأم: تك تك تك ..أسامة

أسامة: يوووه...أيوه يا ماما

الأم: يا بني العصر أذن من ساعتين وانت ضيعت الظهر ...قوم

الحق العصر قبل ما المغرب يؤذن

أسامة: حاضر حاضر. زاعملي بس الشاي

ومرت الساعات واستيقظ أسامة بعد أن نام الجميع

جمع كل الصلوات ودخل إلى المطبخ ووجد طعامه ملفوفا بعناية

ومغطى بفوطة بيضاء

أكل وحده

وشرب الشاي وحده

وسهر وحده

هو: حاضر... اعمليلي القهوة بسرعة

هي: من عيوني

هو: تسلم عيونك

هي: آدي القهوة.. وآدي القميص كويته... وآدي الجزمة لمعتها

هو: تسلميلي يا ست الكل

هي: ربنا يخليك لنا يا رب ويكرمك

هو: عارفه يا زكية أحسن حاجه إنك مش بتشتغلي... مش

عارف لو كنتي بتشتغلي كنت ها أعيش إزاي

هي: ليه

هو: بأغير عليك.. والغيرة بتآكلني لما بأفكر إنك واقفه تنشري

بس في البلكونه... تخيلي بقي لو خرجتي... ها أموت

هي: بعد الشر عليك

هو: أنا نازل

هي:مم...ممكن أدخل انت شويه

هو: مش احنا اتكلمنا قبل كده وقلت لك أنا بأزعل من

حاجات معينه

هي: صدقتي أنا بأقرا كثير وبأستفيد وبأكتب في مواضيع حاوه

هو:لأ...مش موافق

وخرج زوجها ورن الهاتف

تررررررررر

هي:ألو

صاحبته:انت فين؟

هي: معلىش مش ها أقدر أدخل

صاحبته: ليه؟ برده جوزك مش موافق؟

هي : أيوه

صاحبته: أدخلي وهو مش موجود... بالنهار يعني...ومش لازم

تقوليله..وبلاش خالص لما يكون في البيت

هي:تفتكري

صاحبته:هو احنا بنعمل حاجه غلط!!! وبعدين اللي بنكلمهم

متجوزين ودول زي اخواتنا

هي:عندك حق...ثواني وجايلكم

.....

تري

كم مرة تنظرين أختي في وجه ابنك وهو يكلمك

وهل عدد مرات نظرتك للشاشة أكبر أم أقل؟

وكم مرة تتحاور مع زوجتك في أي شيء تتحاور فيه هنا؟

وهل تتحاور معها كما تتحاور مع الأشباح التي تخاطبها على

الشاشة

وكم مرة تتابعين كلمات زوجك كما تتابعين كلمات صديقاتك على

المنتديات

وهل تعملين بما تنصحين به

وكم عدد المرات التي رددت أمك فيها عن باب حجرتك يا بني

ويا أخي الشاب

وهل بقي من عمرها من اللحظات ما يكفي لترضى عنك

دعونا لا ننساهم

وتذكروني

فقد

مررت من هنا!

34

احترس من المهلبية

المهلبية هي علاقات هلامية جيلاتينية على شبكة التواصل
الاجتماعية

وبتلاقيها ملخبطة وفيها حاجات بتمشي وكلايغ

لأنها صحوية بين اتنين في شات ورسايل مستخبية وتالتهم
شيطون الخناس

وتعالوا نشوف مثال:

مهلبيه سادة

- جوجو وتيتي

اللي هم (جابر) و فتحية

ودول بيحبوا بعض من سكات على الفايسبوك وفاكرين إن

ماحدش واخذ باله

هو يحط صورته بالقميص المشجرة وهي

like

وهي تحط صورتها بالعباية البرتقاني أم كسر وهو

like.

والكومنتات بتسيح خالص وفي رسايل خاصة

وبابا قاعد يدفع فواتير الانترنت وماما فاكراها بتذاكر

وبعد الشات اللي كله حب يقول لها

لا إله إلا الله

وبتقول له

محمد رسول الله

مهلبيه بالأيس كريم

- فيفي متجوزة وعندها 38 سنة

ورامي 25 سنة

(هي تقول له ياخشى كيلة وحا اشوف لك عروسة ...

وههمع.. وديجي ديبي دو

على فكرة

هو مش زي أخوك الصغير

ولا ابنك

وحا تترحلقي قصدي تنزلقي في الشات وممكن تتكسر رقبتك.

مهلبيه بالمكسرات

- حمادة متجوز وشوشو متجوزة

والشيطان بيزحلق هنا خالص وممكن حمادة يقعد يكتب
بالساعات

ل شوشو علشان عندها مشكلة مع جوزها

أصله جرح شعورها لأنه يياكل البطيخة مراكب مراكب مش
مكعبات بالشوكة وبتفضفض لحمادة وهي سائدة على المكلسة
ورابطة راسها بالايشارب الاخضر وبتعيط

علشان بتثق فيه

وحمادة غرقان في المهلبية وفاكر نفسه بابا ضياء بتاع برنامج

ماذا تفعل لو كنت مكاني

وقاعدة بالبيحامة الكاستور المقلمة وشعره منكوش وبيكلمها

على الشات وسايب مراته دمعتها على خدها ...

طب مش تشوف نفسية مراتك الغلبانة الأول

واللي ها تتسئل عليها قدام ربنا.

صديقتي الحبيبة والغالية:

تعالى وفضفضي معايه أنا واخواتك

معانا أم محمد وأم أحمد وأم سارة وأم رامي

وفاضل لنا أمنا الغولة ونبقى كلنا الطقم

ويمكن نعمل جروب ونسميه

فضفضي براحتك يا حبيتي
ما تفضفضي لواحدة ست أهي حنينه برده

هو لازم راجل!

بلاش المهلبية

وخليكي في الرز بلبن

وتعالى فضفضي لاختواتك

إحنا هانريجوكي يا شابة

35

أشياء تعين على غض البصر

ركزوا كدهون

علشان تقرب من ربنا

الآباء

مش لازم تسأل على مستوى ابنك الدراسي كل يوم ورايح
جاي ع المدرسة ...عرفنا إنك أب صالح

كفاية

(الأبلة حلوة وبتحط روج)

ومراتك الغلبانة بتحل الواجب وطالع عينها.

الشباب

وأنت ماشي في الشارع بص على جزمتك وعد بلاط الرصيف
وما ترفعش راسك إلا وأنت بتعدي الشارع بس

الناس حا تفترك مفكر أو كاتب وكده وحا تتشهر بعد فترة
ياذن الله.

(قول يا رب)

البنات

خليكي خجولة وبصي في الأرض ودوري وبجلقي
يمكن ربنا يرزقك وتلاقي جنيه هنا واللا هناك
حا ترزقي إن شاء الله

المثقفين

لو أنت ما شاء الله مثقف ومتابع النشرة أو برنامج حوارى من
دول

والمذبة حلوة

ركز في شريط الرسائل

مسلي وجميل ويحكوا حكايات

بلاش تنقل نظرك مباشرة من على وش المديعة وتبص لمراتك

فجأة

إديها فرصتها دي غلبانة و لسه غاسلة المواعين

ونفسيتهها تعبانة

بص للنجفة لحد ما المديعة تمشي وأمرك لله.

الستات

ركزي على الكرافتة بتاعة المذيع أو ودان البطل لو متابعة

مسلسل

وبالمتابعة ها تعرفي مين بيكرر الكرافتات ودي تمارين للذاكرة

وبلاش تركزي مع إيدين المذيع لو متعصب علشان ها تدوخي
ويمكن تتحولي بس مش مشكلة.

النضارات

لو أنت بتلبس نضارة أبشر

اقلع النضارة واتفرج وإدعيلي

هاتشوف طشاش بس ها تبقى سامع كويس ما تقلقش.

(اعتبره راديو أجدادنا كانوا عايشين من غير تليفزيون وكانوا

زي الفل)

العائلات

لو المشكلة في جوزك وللأسف مدمن مسلسلات وأفلام

خلي حركاتك سريعة

أول ما البطلة تيجي إخطفي النضارة

وقولي بصوت مصطنع رقيق تصحبه نبرات الحنان واحذري من

نظراتك:

الله يا حبيبي

باحب شكك من غير النضارة

ها يفرح بنفسه وينسى البطلة.

(مؤقتًا)

الرياضيين

بلاش تتابع الأولمبيكات

أيون

وتعمل رياضي

في جمباز وبنات ومايوهات

وأنت كنت عارف من الأول.... يبقى قاصد وسيئاتك ها تزيد

تابع كل الالعاب الثانية وبلاش دي.

(وأنتِ إلغي القناة وجوزك في الشغل)

ربات البيوت

لو لقيتي واحدة من بتوع

سيداتي أنساتي ساداتشيبي

إخطفي الريموت ما تسكتيش

وهاتي سبيس تون للعيال.

اشتري له جرايد...القراءة للجميع

وخذني بالك من جوزك

مش لازم قناة فتافيت طول النهار..

لأن اللي بيحرفتوا ويفتتوا ويتفتفتوا

ستات ومنتسشورين ولا بسين

وأنت ماسرحتيش من أول إمبارح

الزهقانيين

بلاش برامج الرياضة للجميع بتاعة كابتن ساسم اللي لابسين

استرتش دول وبيقفوا صفين وبيتنططوا ويطرقصوا

قال إيه تمارين للمفاصل ووجع الظهر والرقبة عيب كده

وأخيراً

ما تبصش للحرام

علشان تعرف تشوف ربنا

وتفتح عينيك في الحلال

36

كلام للمكبطين

أيون مكبطين ...

ركزوا معاية

لحد إمتي حاتفضلي حساسة؟

ولحد إمتي حضرتك هاتزعل!

سيبك منهم وحب نفسك وحي نفسك

ماهو لو فضلت قاعد في عزلة وحاطط إيدك على خدك وما
بتقابلش حد

أنت بس اللي هاتتوجع.

أنت بس الخسران

هاتحرم نفسك من الحياة وتفضل منتظر نجاح الريجيم.

مكسوف من نفسك ليه...هو الطخن حرام!

ما تتكسفش إلا من حاجة حرام

ممنوع الاكثاب

ممنوع الحزن

ممنوع إنك تتقمص لو حد قال لك اللبس ده مش مناسبك

وخصوصا لو من عيلتك خدها بروح رياضية

اضحك معاهم

لأنهم ييجوبك وفكر في رأيهم.

البس لبس واسع وشيك

اعرف إزاي تداري عيوبك

بلاش بنتلونات ضيقة يا طماطم

وبلاش القميص والبدلة الضيقة يا بطاطس

عارفين رجاء الجداوي....عارفينها..صح

طول عمرها شيك!

عمر ما طخنها منع إنها تلفت نظرنا بشياكتها ولبسها ولونه

بتعرف تخبي عيوبها

البسي اللي يناسب جسمك وانبسطي مع البنات... وعقود بقي

واشارات وعيشي حياتك

ولما تخرجي حافظي على الحجاب.

عيش حياتك وبلاش تزعل

على فكرة دمكم خفيف

ما اعرفش ليه بس هو كده

الطخان زي العسل وروحهم خفيفة

لو حبيت نفسك وتقبلتها

ها ينجح الريجيم

آه والله

وها يبقى سهل... لأن معنوياتك مرتفعة

ولأنك فرحان ومرتاح نفسيًا

عزيمة بقي وإصرار وكده

ما هو لازم برده ننظم أكلنا علشان صحتك أصل الصحة نعمة

خلاص

من النهارده لازم تضحك

بص لنفسك في المرآة وكلمها

قول لها أنا بحبك وحاساعدك

ابتدي رجيم وكافيه نفسك كل أسبوع مرة.. واكتب لنفسك لما

تحس كلام جميل

امشي كثير وسبح واستغفر وأنت ماشي

ولو مرة حد سخر منك أو زعلك كبر دماغك

وعلى رأي المثل

البت اللي ملهاش حدود ملهاش وجود

37

إحتفال بريء

دار حوار ساخن في أحد المصالح الحكومية حيث دلفت إحدى
الموظفات بلباسها الأنيق وقوامها الرشيق وعطرها الفئان
فأدارت رؤوس الجميع
وكانت نهاية اليوم عودة الأستاذ "منير" إلى بيته ساخطًا على
زوجته

التي ذهب بريقها بسبب الحمل المتكرر
وصارت كئيبة كما همس لنفسه وهو يصعد الدرج

خطوة...خطوة

وأخيرا وضع المفتاح في الباب..وأداره ليدخل وقال بخنوع:
السلام عليكم ...مالك يا حبيبي ؟

قالت بألم:

أهلا يا منير ...ما نمتش ولا ثانيه يا منير العيال زي القرود من
ساعة ما انت خرجت وهم على دماغني

قال برثاء:

معلش ربنا يعينك ...ب..بأقول لك إيه

ردت وأحد أبناءها يتسلق كتفها:

أيوه يا حبيبي

قال بحزم:
إحنا لازم نبدا ريجيم من بكره

ردت بهدوء وهي تحاول أن تكتم صرخات الألم بعد عدة لكيات
من إبنها على ظهرها وهي تتحدث:
-وماله يا حبيبي..نبدا

قال بحماس شديد وقد بدا البريق في عينيه:
-وايه رأيك تقصي شعرك وتضريه في الخلاط من زمان ما
شفتكيش كده

اجابت ببرود:
-حاضر من عنيه بعد ما أخلص تطبيق الغسيل ها أنزل أقص
شعري

قال يانهار:

-وعاوزك كده تلبسي فستان جميل جميل آخر حاجه...وطني
مونوكير

قالت بصوت مشروخ:

-حاضر يا حبيبي بعد ما أغسل المواعين ها أنزل أشتري
فستان بكرانيش وها أحط مونوكير

قال وهو يرفع حاجبه الأيسر:

-وطني روج

أجابت في خفوت:
حاضر ها أكوي قمصانك وأروح أحط روج

أضاف وهو يرفع حاجبه الأيمن:
-واعملي حاجة في دماغك

أجابت بهجة مفتعلة:
-حاضر ها ألمع النجفة وألبس الأباجورة في دماغي

أضاف أخيرا:
-وركبي رموش...عاوز رموش..رموش

ردت وهي تجزّ على شفيتها وإبتها تجذبها من شعرها:
-حاضر يا حبيبي... رموش رموش

واتجه إلى غرفته حيث نام لساعات طويلة، وفجأة وبعد أذان المغرب بلحظات استيقظ على صرخة مريعة....

فتح عينيه فإذا الغرفة مظلمة، والدخان منتشر في كل مكان، ورائحة الحريق تملأ أنفه، حاول أن يتحرك من مكانه فإذا بها تنقض عليه و تمسكه من كتفيه
قال بفرع وقد ارتعدت فرائصه:
فيه إيه....انت مين؟

قالت بدلال:

-أنا يا حبيبي

ازدرد ريقه بصعوبة وقال:

عينيك مالها وايه الاسود اللي حوالها ده؟... وشعرك مالها انت
إتكهربتي؟ وايه الأحمر اللي حوالين شفايفك ده... ولا بسه
جلا بيتي النبي ليه ومين قطع كماها كده؟

قالت بفرح:

مش انت عاوز رموش وأسود وأحمر وكرانيش

قال وهو يرتجف:

آه يا سوادي قصدي يا حياتي... بس ليه...؟

قالت بدلال:

أصل النهارده الهالوين يا حبيبي.

....

"خفف عن زوجتك الضغط والمسئولية وهي ها تلاقي مساحة
وتهتم بنفسها من غير ما تطلب"

38

حقك عليه

كلمتين ما يطلعوش إلا من قلب بيحب بجد
قلب نضيف، يبقى جاي يصالح لأنه مصالح نفسه
ساعات تتخانق مع شريك حياتك
زوجك ... زوجتك

نصفك الثاني زي ما يقولوا...والأصح (كلك) الثاني ما هي
خلاص بعد الجواز والحب ما بتبقوش نصين بتبقوا حته واحده
علشان كده بتتوجع قوي لما بتزل منه.

بتزل وتبعد وتسكت وتفكر وتفكر

وتحس إنك بتتحرق.

ولو حد حاول يهديك مش هتسمعه ولا هتشوف كلامه **لأنك**

بتبقى عاوز تحكي بس اللي بيوجعك ..

عاوز حد يسمعك.

وعلى فكرة مش هترتاح مهما اتكلمت ومهما بكيت؛ لأنك مش

هترتاح إلا لما تتكلم مع اللي أنت أصلا زعلان منه.

الشيطان مش هيسيبك وهيفكرك بكل غلطة وكل هفوة

وممكن حاجات أنت وقتها اتصرفت بحكمة وعديتها وأخذت
ثواب..

بس إبليس اتغاض وعاوز يحبط لك ثوابك ومش هيسيبك.

وهتلاقيك بتقول لنفسك وللناس:

(أنا) عملت مرة

و(أنا) سمحت مرتين

و(أنا) ما رديتش في اليوم الفلاني

ومش كفاية إن (أنا) استحملت كذا وكذا

طب وبعدين! ولحد إمتي؟

فاكر.....؟

فاكر لما شفتها أول مرة، لما رحلت تخطبها ..ركز .. وافتكرك

مش قصدي أول نظرة، لأ... أول دقة قلب في صدرك حسيت
بيها ، وأنت بتتكلم معاها وعرفت إن هي دي
خطفه كده في روحك ..

بتبقى عاوز تحط إيدك على قلبك علشان تمسكها قبل ما تهرب
من فرحتك ...

بتزعلها ليه بقى ... دي حبيبتك

طيب مش بتسامحها ليه...سامح وعديها.

فأكرة.....؟

فأكره لما كنتي بتحسي إنك طيارة في السما وسط السحاب
وعاوزه تحضني كل الناس وتتنططي من الفرحة علشان هو

اتصل بيك وقال لك بجدك ...

مش ده جوزك حبيبك ..

بتزعليه ليه ؟

طب مش بتعديها له المره دي ليه ؟

ما تقولوش كرامه

" الحب بين الزوجين مافيهوش كرامة، في صحيح مسافات
وزوايا بتتظبط من قبل الجواز، لما بتروح تخبط على باب بيتها
وتختارها صح، بنت الطيبين ومترية وعارفة يعني إيه (أصول)
ولما بتوافقي عليه لأنه على خلق ودين مش منظر وبس، ساعتها
بيبقى في رصيد قديم، ومواقف تتشال على الرأس، وكلام
مايتنسش

كلام حلو، وحاجات حلوة كمان كثير".

افتكر كام مرة فرحت مع (كلك) الثاني، افتر السكينة اللي
أنت مفتردها دلوقت وأنت زعلان معاه، مش هترتاح على
فكرة إلا لما تتصالح معاه ... كلنا كده.

في مساحة ود ورحمة لازم تفضل في كل بيت وكل قلب
عندها بتنسى كرامتك وتقلع التاج اللي على راسك وتمشي حافي
ما حدش أحسن من حد

أنت وزوجتك

وأنت وزوجك

مش عيب ولا حرام إنك تقول أنا أسف

(حقك عليه)

اتشجع وقولها وأنت ثابت وخذ نية

خدها لله

قول لحبيبيك ... حقك عليه

ويا بنخت اللي يسبق ويأخذ الثواب والأجر.

اللهم أنزل السكينة على بيوتنا جميعا وبيوت المسلمين

واسعد كل زوجين.

* * *

تيكييلام تيكلام تيكلام

استيقظت على صوت جرس هاتفها النقال، وكان هو المتصل،
أخبرها بجنان أنه في الطريق إلى البيت وطلب منها أن ترتدي
ملابسها وتتأنق هي والأولاد، فرحت وقفزت من فراشها فهي
فعلا تحتاج للخروج فالأسبوع كله كان ضجيج، اختبارات
الأولاد، وتنظيف الشقة استعدادا لرمضان، غسل السجاجيد
وأشياء أخرى.

فووووم فوووم، فررررووووم

وصل في موعده بابتسامته الساحرة وسيارته العجيبة
وكانت في منتهى الأناقة، العباءة والطرحة والحقيبة الفاخرة
والحذاء اللامع، وركبوا معه.

مروا أولاً على بيت أمها فصعدت وحدها وسلمتها الأبناء،
ونزلت بسرعة وهي تطير كالفراشة، استقبلها بابتسامة هائلة
وقاد سيارته بهور وكأنه شاب مراهق!

بدأ يضحك ويغني ويهمهم و يحدث نفسه ...

لم تفهم منه شيئاً.

سألته وهي تتعجب:

هو إحنا رايعين فين يا حبيبي؟

أجابها وهو يبتسم إبتسامة مأكرة:

مفاجأة.

تسارعت دقات قلبها وأخذت تفتش في ذاكرتها عن تاريخ اليوم

هل هو يوم ميلادهالا

هل هي الذكرى السنوية لزواجهما..

لا لا لا

إرتابت قليلا وابتلعت ريقها بصعوبة فهي لن تحتمل

ربما هي فعلا المفاجأة التي تنتظرها منذ سنوات

وجبة غذاء أنيقة، في مطعم فاخر، على مائدة مستديرة، عليها

شموع، ووردة حمراء، و بطريقة رومانسية سيقول لها

(زوجتي، زوجتي، أنتِ حبيبتي أنتِ).
التفتت إليه وقالت بدلال وبضحكة خجولة لطيفة:
عرفت يا شلبي حا تغديني في مطعم سحتوت ... صح؟
غضن حاجبيه وأجابها وهو يدبر زر الراديو باحثًا عن إذاعة
الشرق الأوسط

وقال بصوت مخنوق:
لا يا شلبية ... كرفور عامل عرض على زيت كالالا على كل
إزازتين كيلو رز هدية
قلت آخذك بالمرّة نجيب لوازم البيت قبل زحمة رمضان.
كل سنة وأتم طيبين.

الوردة الحمراء

وأخيراً...شعر بجنين، ودق قلبه، وتذكر أول مرّة رآها
بالفستان الوردى، قرر أن يشتري لها وردة وهو في طريقه إلى
البيت،

أسرع يقود سيارته إلى محل الزهور المشهور الذي يقع قريباً من
بيتهم،

وترجل من سيارته وهو يغني:

اسبقني يا قلبي اسبقني

تيرا رااا

على الجنة الحلوة اسبقني
قرر أن تكون الوردة حمراء رمزا لحبه لها فانتقاها بعناية وقبّلها
وهو يضعها بجواره وهو يقود سيارته متجهاً إلى البيت.

هرول على الدرج وفتح الباب
وانطلق مشتاقاً يبحث عنها هنا وهناك

أين أنتِ يا أميرتي؟

أخيرا وجدها في المطبخ

اقترب بحنان وهمس في أذنها:

حبيبتي أنا جبت لك وردة

أجابته بمرح:

الله... حلوة قوي يا حبيبي

ثم ازاحت بلطف دموعها التي سالت من تقطيع البصل

بأطراف أناملها ...

وبحركة خاطفة...مسحت أنفها بكم جلبابها بعد أن شهقت

شهقة عميقة فوق حلة الملوخية

ثم أشارت إلى صدره بالسكين وقالت بتهدج:
حطها هناك على الرخامة يا حبيبي لحد ما أخلص التقلية وأنا
ها أشمها بعدين،

وخذ في إيدك طبق الممار والفتة وحطهم على السفرة
وخليك قاعد لحد ما آجي لك لاحسن العيال يكبوا الشورية
على الأرض...

وقبل ما تمشي حط الوردة في شوية ميه.
قال برثاء:

الوردة خلاص ماتت يا حياتي.

.....

"شجعي زوجك يعبر عن مشاعرة...الحياة مش مطبخ وبس"

في الركن البعيد الهادي

اختاري مكان هادي في البيت

كرسيين وتراييزة

هاتي ورقة وقلم

نادي جوزك وقعديه

هزي اللمة

وبرقي

خدي نفس عميق واسألني الأسئلة دي وخليه يختار إجابة من
الثلاثة:

السؤال الأول

- لو أنا مت بعد الشر عليا يا حبيبي

هاتعمل إيه؟

1- طبعا هافرح وأتجوز واحدة ثانية.

2- هافضل حزين طول عمري ومش هاتجوز ثاني.

3- هازعل شوية وبعدين للأسف هاضطر اتجوز... علشان

العيال

لو اختار الإجابة الثانية يبقى بيخاف منك

وأنت شخصيتك قوية

(طول ما فيك روح)

السؤال الثاني

*لو طلبت تكتب لي كل أملاكك باسمي

هاتعمل إيه؟

1- هارميك من البلكونة

2- هاسيبك جنب الأنبوبة

3- ها اقتلك

لو إختار أي إجابة من الثلاثة

يبقى صريح... صريح... صريح

وعرفتي تختاري

السؤال الثالث

*عمرك فكرت تتجوز واحدة ثانية؟

1-أيون

2-طبعا

3-آه

لو اختار أي حاجة

يبقى صادق يا حبيبي صادق

ومش بيحب الكذب

ما شاء الله عليه

السؤال الرابع

*أنت لسه بتحبني زي زمان؟

1-لأ

2-أنت مين أصلاً

3-ولا أعرفك

معلش يا حبيبتى أنت فاجئتيه بالسؤال

ولا كإنك سألتى

عدي على اللي بعده

السؤال الخامس

*إيه أكثر حاجه بتعجبك فيا؟

1-بتفكريني بربنا كل ما أشوفك

2-باستغفر ربنا كثير وأنا معاك

3-الناس بطلت تحسدني

شفتي طول عمرك متدينة

وقربتية من ربنا.

السؤال السادس

*إيه رأيك في شخصيتي؟

1-هي فين

2-طب وريهالي الأول

3-يعني إيه شخصية؟

معلش يا حبيبتني

ما يقدرش يجاوب على حاجه ماشافهاش

إنسان أمين أمين ...

طول عمره أمين

خلصنا كده

اطلعي بقى فوق

واقري الأسئلة الستة دي تاني

واقري إوعي تسألها لجوزك

أبدأ أبدأ

مش كل الكلام يتقال.

المرجحة بالفندقوش

أنا: أنا اشتريت المرجحة بالفندقوش.

أتم: إيه المرجحة بالفندقوش دي يا خالتو؟

أنا: حاجة كده جميلة

قوي جدا خالص خالص، شكلها ملفح، وطعمها زي

السراريش، وريحتها تحفه زي المهايخ

وعليها من فوق دحاليج، وحلوة مع الشاي بلبن.

أتم: الله!..أكيد حلوة ... شكلك فرحان يا خالتو

يا ترى بالشوكولاتة دي والللا الكريمة أنتِ أكلتي كام حته؟

طب عاوزين نأكل وندوق وكده.

أنا: في ناس كتير أكلتها ربنا يرزقكم بقى ويحنن عليكم

يا عيني يا مساكين.

أتم: يا ترى شكلها إيه؟

وايه السراريش دي؟

ومين الدحاليج دو؟

وروحوا وناموا واحلموا وافتحوا التلفزيون

واتفرجوا على الإعلانات والأغاني والأفلام واسمعوا كام بيت
شعر في وصفها وقصة قصيرة ورواية عن شعورك وأنت بتأكلها.

في جزء منكم هيتخيلها حلويات, والثاني حوادق, والثالث
هيشوفها فطيرة والرابع برايم برايم.

وارفع سقف التوقعات لفووق لحد ما رجلك تطير في الهوا

واحلم أحلام وردية وخيالية

واحلم معاية ببكرة جاي ولو ما جاش إحنا نجيبه بنفسنا

قوم إيه بقى لما تيجي تأكلها -ورغم إنها حلوة جدا وبما لا يخالف

شرع الله- تقول إيه ده

أنا كنت فآكرها أحلى من كده

ويجيبك إحباط

وممكن تدعي عليه

أهو ده اللي بيحصل مع الحب والجواز

إتهرينا في الأفلام والمسلسلات وأغاني أم كلثوم وعبد الحليم
كلام في الحب وسيرة الحب وسنين الحب وعذاب الحب
وكل بنت قاعدة مستنيه العريس الوسيم الشاطر

(الشاطر حسن)

ييجي بسلامته راكب حصان أبيض
ويخطفها من أبوها وتعيش في قصر كبير وتلبس فستان واسع
وتغيظ الملكة.

أو يكتب فيها شعر ويتشعبط على المواسير
ويطلع لها من البلكونة ويقع فتتكسر رقبتة ويتجوزوا في
المستشفى.

والشاب من دول فاكر إنه هيتجوز سندريلا

وهيرجع الظهر يلاقي الأقدام السبعة خلصوا شغل البيت
وغسلوا المواعين وهي الأميرة النائمة وهيصحبها بقبلة رقيقة على
جبينها

وهتقوم من النوم متسشورة وحاطة روج ولابسة جزمة.
وسقف التوقعات يرتفع لفق أكثر لما بتكتب قصص الحب
وكلام الحب مع صورة اتنين شكلهم حلو
وهي لابسه ومتأنتكه وهو حاطط جل في شعره و شايها
أو ماسك مناخيرها مسكة سينمائية وهي حاضناه وماسكة
ودانه.

ويبيص لها بحنان وبتبص له بدلال

(مع الاعتذار لدلال)

وروحوا وناموا واحلموا وافتحوا التليفزيون واتفرجوا على
الإعلانات والأغاني والأفلام واسمعوا كام بيت شعر في وصف
الحب وقصة قصيرة ورواية عن شعورك وأنت بتحب.

وتعالى اتجوز

وتعالى إتجوزي

الإنسان اللي إختريه وفرحانه بيه وطبعا اللي لسه عايش في
الأحلام ومتوقع شيء خيالي وساب نفسه للمؤثرات المرئية
وكلام الناس

والرغي والفتي الكثير ونسي الواقع هيكون شعوره كده زي اللي
أكل المربحية بالفندقوش ولقاها مش حلوة وزى ما كان فاكر ...

رغم إنها حلوة وزى العسل.

افهموها صح

"الحب بين الزوجين ليس له قالب واحد ولا نموذج متفرد كل زوجين لهما حالة خاصة من الاندماج والتفاهم والحب تختلف عن الآخرين

والسعادة مذاقها مختلف من شخصية لأخرى فلا تطبق تجارب الآخرين على نفس".

الحب مش محتاج أميرة وأمير ومملكة جمال وفارس الفرسان.
الحب يعني تحبها بعد الجواز حتى وهي حامل ووشها مورم وخدودها منفخة.

يعني لو بقى أصلع وبكرش يفضل فارس أحلامك.
يعني مش محتاج يكتب شعر كفاية كفه اللي بتطبطب على ظهرك ما هي دي ترجمة كلمة بجبك.

يعني هي جميلة لأنك بتحبها حتى لو هي مش جميلة.

يعني كل لحظة تمر عليكم مع بعض بتعيشوا جوا بعض.

يعني أنت مسجون في روحها حبس إنفرادي.

يعني أي بنت حلوة مش هتلفت نظرك؛ لأن قلبك شبعان

بحبك لزوجتك.

- آه والله شفتي ...حاجة بقي إنما إيبويه.

- طب وريني كده.

- لأ استني أنا اللي هافتها علشان ما تبوظيش العلبة.

- طب هات بس ما تخافش.

قلت لك لأ لازم أنا ... ده أنا دافع فيها دم قلبي

- طيب بسرعة افتحها أنا فرحانة ربنا يخليك يا حبيبي يا رب .

- أهه ...شفتي خاتم ذهب عيار أربعة وعشرين.

- مش شايفة نزل إيدك أنا قصيرة مش شايفة ...هات بقي.

- يااه حا ياكل من إيدك حتة ... مبروك عليك.

- ربنا يخليك يا رب.

- بس ما تغسلش بيه المواعين بقى.

- حاضر.

- وخليه للخروج بس لاحسن يتهدل واللمعان يروح.

- حاضر.

- وشيليه في علته.

- حاضر.

- وفرجيه لمامتك وكده.

- حاضر.

وبعد أسبوع ...

- ياللا بينا نروح لماما إلسي بقى وما تنسش الخاتم اللي

جبتهملك الإسبوع اللي فات.

- حلو جدا ولايق على لون الخاتم.

- خاتم إيه!

- اللي جبتھولك السنة اللي فاتت.

- آاااه صحیح.

وبعد ستین سنة ...

- طقم شنانك على التشریحة في أودة النوم يا حج.

- أشلي بأدور على الخاتشم اللي جبتشھولك قبل ما تولدي

باشم علشان ألمعه وتلبشيه يا حبيبتشي في فرح شارة بنت

شعاد.

- ربنا یخلیك ویدیك طولة العمر يا حج.

- تعيشي يا حبيبتشي ...بش كان خاشم تشحفه وعمري ما

شفت زيه.

-ولا أنا يا حج شفت تاني.

44

خليك في هالك!

في ناس ما يهمهاش غير نفسها وبس...مثلا لو قلت لهم:

-في واحد داخ ووقع في الشارع تعالى تفوقه ونوصله بيته.

-مالناش دعوة كل واهيد في هالوه يا مهبي.

السلم مش نضيف وما فيش بواب في العمارة تيجوا كل واحد
مننا ينضفه يوم.

-مالناش دعوة كل واهيد في هالوه يا هنفي.

الست اللي في الشارع اللي جنبنا حايطردوها علشان مش
بتدفع الإيجار من يوم ما جوزها مات.

-مالناش دعوة كل واهيد في هالوة يا هوسني.

ماما تعبانة وسخنة والمطبخ بقى شبه جبلاية القروود ما تيجي
تقوم ننضفه علشان نفرحها.

-مالناش دعوة كل واهيد في هالوه يا هلي.

أسامة تعبان والامتحان قرب تعالى نزوره ونصور له
المحاضرات.

-مالناش دعوة وكل واهيد في هاله يا فتهي.

في ناس غلاية جعانة كثير تعالى نعمل أكل ونوزعه عليهم.

-مالناش دعوة كل واهيد في هالوه يا هنفي.

جارتنا ولادها سافروا وبقالها أسبوع مش باينة ما تيجوا نخبط عليها وناخد لها كيلو برتقان ونزورها يمكن عيانة.

-مالناش دعوة كل واهيد في هالوه يا صهي.

المسجد عاوز يتنضيف تعالوا نكنسه وتنضفه ونعطره كده ونخليه فله ونغسل الحمامات قبل يوم الجمعة.

-مالناش دعوة كل واهيد في هالوه يا صاهبي.

عارفينهم الناس دول؟

منهم لله

45

عش الحب

جاء الصباح وشققت العصافير
وغردت البلابل واهتزت الأشجار وطارت الفراشات وعشش
الحب في بيت سعيد

- صباح الخير.

* صباح الفل يا أجمل زوج في الدنيا.

- بأقول لك إيه يا حبيبتى قومي اعمليلي الشاي وسندوتش
جينة بطماطم على بال ما ألبس علشان إتأخرت على الشغل.

مش قادرة يا جميل أصلي كان عندي أرق وتعبت بالليل يا
حبيبي.

- هو كل يوم أرق! ... ألف سلامه .

* روح أنت يا عسول حط البراد الأمور على النار واعمل
الشاي .

- حاضر.

بعد شوية ..

- أنا نازل.

- إيه الشياكة دي ... أنور وجدي يا خواتي .. مع السلامة.

وبعد الظهر ...

- السلام عليكم.

- وعلكم السلام يا أجمل زوج في الدنيا كلها.

- فين الأكل؟ أنا ميت من الجوع.

- طب قبل ما تغير هدومك يا سكر انزل هات لنا

كيلو طماطم حمرة زي خدودك

وكيلو بطاطس مقطقة زي مناخيرك

وكيلو بصل عسول زي ودانك

وكيلو بدنجان إسود زي عيونك

وعلبة سمنة نونو كده وصغنته.

- وماقلتيش ليه الصبح وأنا نازل؟

أنت من يوم ما مامتك بطلت تبعت أكل ماطبختيش.

- مارضيتش أقلقك يا جميل وقلت لما ترجع.

- طب مافيش أي حاجة تتأكل في البيت.

- في تونه صبغونه روح برجليك الأمور هتلاقيها في المطبخ

العسول

ويا ريت تغسل المواعين علشان أنا حطيت لك لون المونوكير

اللي بتحبه.

- طب تعالي كلي معايه.

- كل أنت بالهنا والشفا يا جميل .. أنا أكلت ساندويتش
لانشون عسووول

بالليل

- هو فين القميص الأخضر؟

- في الغسيل يا حياتي.

- والبنطلون الكاكي؟

- حرقتة وأنا بأكويه يا روجي.

- وشراباتي كلها فين؟

- منورين في الحمام يا نور عيني.

- طب وبتغسلي إمتي.

ساعدي وحطهم في الغسالة الجميلة المربعة يا عسل وشغلها
على بال ما أعمل لك الشاي يا قمر.

تاني يوم ...

تك تك تك ...

- ميين؟

- أنا أمك العسولة يا ننوسة

جاية ومعايه أبوك القمر يا ستوته

علشان ناخدك على بيتنا المحدث على دماغك يا توته

لأن جوزك المحروس طلقك يا أمورة

حضري شنطتك المقطقة يا نور عيني.

46

عريس إلكتروني

في بيت دافئ وبينما تقف الأم بين الأبخرة المتصاعدة من الأواني

المختلفة لتتعانق في حنان وحب وتحلق فوق هذا البيت الهادئ

دخلت أميرة على أمها وهي تصيح

-أماه لقد جاءني عريس

- الحمد لله يا ابنتي لقد هرمتنا في انتظار العريس المطلوب

-نعم أخيراً يا أمي كم أنا سعيدة

- والله لقد طلع من عيني الاثنتين العريس الذي رفضتيه

الأسبوع الماضي.

-لا تحزني يا أماه، فهذا أفضل منه

ويقول أنه معجب بشخصيتي المنظمة وتفكيري المرتب

-تنيلي على عينيك يا ابنتي الحبيبة واذهي أولاً ورتبي غرفتك

ومشطتي شعر رأسك

-حاضر يا أمي كفاك صياحاً يا غالية أين المحروس بسلامته

أخي؟

- وأين سيكون مثلاً! على الأريكة في غرفته يشاهد التلفاز.

سأذهب لأشاهد معه برنامج (العرب لهم مواهب) فأنا أشجع
المشارك الذي يعني

(بالإنجليزية)

يا خيبتك الثقيلة أي موهبة عربية تلك وهو لا يعني بلغته
الأم!

-لأنه يتيم...أأ أقصد...صوته الرائع هو المهم.

- جاءتهم ستون خيبة أين الهوية العربية في المواهب!

-موجودة يا أمي فالحفلة في بلد عربي...العالم تغير يا أماه نحن
في عصر الإنترنت.

- ليته ما تغير .. حتى اسم البرنامج مكتوب بالإنجليزية واسم

القناة التي تعرض الحلقات بالحروف الإنجليزية والمواهب

أمريكية .. والتصويت ب yes نعم يعني.

- وامصبيتهاه داخل صندوق!

- يا أمي أقصد رسالة إلكترونية مكتوبة.

- وماذا قلتي له يا فالحة؟

سألني عن عمري ودراستي واسم أبي وعنوان عمله وعنك
...إلخ إلخ.

- يا وقعتك السوداء ...يا نهارك الذي لن يفوت ... وأخبرته
كل شيء.

-لا يا أمي طبعًا ولكن أرسلت صورتي فقط

- حسنًا حسنًا ...ويا خبر بنقود غداً سيكون مجانًا، ومتى
سيأتي يا فلذة كبدي؟

- لا أعرف

- هل عنده شقة؟

-يا لا جيت أهه هاكوي وأنت بتكلمني القميص اللبني اللي كنت
لابسه أول يوم في شهر العسل ...فاكر.

- خلصتي؟

- أنا جيت أهه خير؟

-لأ قومي رضعي الولد ونيميه علشان مش عاوز دوشة

- خلاص نام خير يا حبيبي .. عسول وهو نايم وشبهك خالص

ترررن...جرس الباب

- ممكن تفتح؟

- لا رجلي منملة ... افتحي أنتِ الباب

- ثواني هاخذ الحاجات من البواب وراجعة لك.

- وأنت رايحة هاتي لي الموبايل وطفني المروحة وناوليني القهوة.

- حاضر.

- حبيبي أنا خلصت ممكن توديني لماما بكره وأنت نازل.

- لأ

- ليه بس

- كفاية مرة كل أسبوعين

- طيب ممكن سحر تيجي تزورني

- لأ

- ليه

- لأنها هاتقعد تحكي لك على الكلية وتزعلي إنك ما كملتيش
واحنا قلنا مش هاتكملي خلاص دراسة علشان البيت والولاد.

- طيب عاوزة مصروف ممكن؟

- هاتعملي بيه إيه أنت مش بتخرجي وأنا باجيب كل حاجة.

- كان نفسي في مجلة كده أجيبها من المكتبة وأخذ توتو أمشيته

شوية في عربيته الصبح يعني.

- مالهاش لازمة... بلاش مصاريف

- طيب ممكن تخرج معايا.

- ههانروح فين؟

- نزور أي حد أو نتمشي

- هي البلد فيها حاجة تتراح

- وديني الحمت اللي بتروحها كل يوم

- مش وقته...رايحة فين أنا عاوز أتكلم معاكي

- أنا جيت أهه؛ خير يا حبيبي؟

- هاخذ رأيك في حاجه ماشي

- اتفضل....بس غريبة أول مرة تسألني رأيي في حاجة؟ يا ترى

إيه؟

- حاجة من حقي ومش عيب ولا حرام

- خير يا حبيبي

- أنا عاوز أتجوز زوجة تانية

- إيه!

حماٲك

ما تزعلش

من حماٲك لو بصٲ لك كٲر
وبحلقٲ يوم ما جٲ ٲخطبك
إبٲها اللٲ قالها بصٲ يا ماما معاٲه لأنه ٲٲٲكسف
مش قصدها ٲبص كده.

ما تزعلش

لو حماٲك قابلٲ (جوز أٲٲ مراتك) ٲٲرحاب أكر

ممکن ٲكون ځل العيلة قبلك بسٲ سنين وواځځين عليه
أكٲر

ويمكن أكبر سنا

يكن أنت أحسن فيراضوه نفسيا ويمكن علشان حاجات
بتفوت عليك ..

خد بالك

ما تزعلش

لو حماٲك ما أكلٲش الكيك اللي مامٲك قدمٲه

الكيك حلو بس هي مكسوفة

طيبة على فكرة .. سيك من اللي حصل في المسلسل

ما تزعلش

لو مرة حماتك قالت كلمة زعلتك
فوتها .. ما هي اللي علمت مراتك الفاتحة والصلاة
وابنك الكبير حفظها من أمه يعني كل سجدة من ابنك في
ميزان حسنات حماتك
ويدعي لك فيها .. شفت بقي .

ما تزعليش

لو حماتك حكيت لك عن مشكلة بنتها مع خطيبها مش قصدها
تعمل إسقاط سياسي على خطوبتكم على فكرة هي بتفضفض

وحتى لو كانت قاصدة طنشي.

ما تزعلش

لما حماك زعلت منك وتقول لك أنت مش مدلع بنتي ...

أصلها ما شافتش الفرحة في عنيا كويس ..

شافتكم وأتم تعبانين بس

بينوها شوية وراضي زوجتك وطبطب عليها وسط أهلها

علشان يوم ما هي تشتكي يقفوا معاك ويعقلوها.

ما تزعلش

إن حماك بتتكلم على ابنها كثير وبتشكر فيه ... أصلها شالته
على قلبها تسع شهور وبتحبه قوي
زي مامتك ما بتموت في أخوك
وزي ما بتحيي إبنك كده ..
يعني حته منها.

ما تزعليش

لو قالت لك الفراخ اتهرت والبامية مش حلوة ... إيه يعني ..
قوليلها هو أنا هعرف أطبخ زيك يا ست الكل علميني ...
واعملي نفسك مهتمة واكتبي أي حاجه واتصلي بيها مرة والللا
اتنين واسألني على أكلة حتى لو ما عملتيهاش وشوفي هتحبك
إزاي.

ما تزعلش

من حماك لما بتلومك ..

أصلها متعشمه فيك خير ومنتظره كلمة حاضر ...

يمكن كلامها غلط

ويمكن رأيها مش صح

بس أنت تقدر تطيب خاطرها

بكلمتين وبالعقل وتعمل اللي أنت شايفه صح.

ما تزعليش

لو ما جبتكيش زي بنتها ..

أصل بصراحة كمان مش بتحبها زي مامتك ... آه والله

خلي كل حاجه في مكانها

أمك ما حدش هيحبك حبا ومش هتتعوض.

ما ترعلش

لو ما حبتكش زي ابنها اللي من لحمها ودمها ..

على فكرة دي بني آدمه وكبرت وعجزت وتعبت وضحت

مش العدو اللدود

لازم تحترم وتحترمي مشاعرها

(خدوا بالكم قوي من اختلاف الفكر والتعليم والثقافة والبساطة
وعاملها على قد إدراكها وسنها).

ما تخليهاش تحس إنها خلاص راحت عليها وهتشيلها في
الصندرة

هتحتها في كرتونة على الرف

وتبص عليها كل أسبوع مرة

وفي العيد تطلعها وتلمعها

ويوم الأم تجيب لها شنطة وتحتها المسكينة جنب الشنطة
والشنطة

سهلها واتفقوا مع بعض

هات خطيبتك أو مراتك واتفقوا اتفاق

هأقول لمامتك يا

(ماما)

وهتقولي لأمي يا

(ماما)

هنبرهم سوا ونسهل على بعض

وفي حضور أُمي هاراضيها على حسابك معلش ساعديني

بكلمتين .. أشكري معايه فيها وفي تربيتها ونضافتها وأكلها

وخليها تحس إنها ملكة ..

وبلاش نشتكى من بعض .. خلينا نشتكى لبعض مننا

وفي بيتنا لما نرجع يا زوجتي أنت الملكة

ويا ريت قبلها يكون في البيت هو الملك.

كلام في الحب

يقولوا الحب بعد الجواز مش موجود، وإن الخطوبة أجمل فترة
في الحياة

وإن... وإن

لأ..طبعا

الحب مش وردة وقلب وغنوة وشوكولاتة وورد وبنت حلوة

الحب بيتترجم لأفعال إيجابية يمكن مش بتشوفوها .. بس

هاتحسوها

طب ... قولوا أتم بلاش أنا

بابا و ماما طول النهار قدامكم صح؟ فاكرين يوم ما بابا اتأخر لما

كان مسافر ماما وقفت إزاي تستناه رايحة جاية؟

بصيتوا لوشها؟

شفتوا الخوف والقلق والفرع؟

سمعتوا دقات قلبها و هي خايفة؟

ما هو ده الحب

إنك تخاف على حبيك من الخطر

شفتوا بابا و هو شايل شنطة سفر

ومعاد الطائرة بعد ساعة

وقلبه بيتقطع و هو بييوس رأس ماما وبيمشي و دموعه بتجرى

على خده .. أول مرة تشوف بابا بيعيط

صح؟

ما هو ده الحب

إنك تكره فراق حبيبك

علشان غالي عليك قوي وبقي حتة من جواك

فاكر لما ماما كانت عيانة وحرارتها عالية وبابا واقف فى المطبخ

بيطبخ بدالها وهو راسم على وشه ابتسامة حنان

ابتسامة موجوعة

ومخنوقة بآلم

ما هو ده الحب

إنك تتألم لآلم حبيبك لأنك مش عاوزه يتوجع

شفتى بابا لما مر بظروف صعبة أد إيه كانت ماما واقفه معاه

واستحملت حاجات كثير

ما هو ده الحب

على الحلوة و المرة ...

وساعات من حلاوة الحب المرارة بتروح وتلاقي الحبيب راضي
بجال حبيبه حتى لو يبشحت

فاكر لما ماما فضلت واقفة تصحى بابا علشان صلاة الفجر
وراسها كانت بتقع وفضلت لحد ما قام وصلى

ما هو ده برده الحب

إنك تتخاف على حبيبك من نار جهنم.

مش تكون سبب فى دخوله نار جهنم

يبقى الحب مش رغبة جسدية فقط

ومش بنكرها

وديننا الحمد لله بيوجه الغرائز صح

"الحب...حنان ومودة ورحمة مع بعض وموجود جوانا فعلاً،
هايطلع هايطلع إن شاء الله، بس كل شيء بأوان".

50

ممنوع الضحك

صباح مشرق...استيقظت على صوت المنبه فقامت بنشاط،
أحياناً أكاد أسمع صوت مفاصلي الخشنة وركبي وهي تسلم على
بعضها، أحاول تعديل إستقامة عمودي (الفأري)

وأتألم قليلاً، لا بد أن السبب هو اللبن الرائع الذي أتناوله
بطعمه الجميل بعد أن تزيل الشركة كل ما فيه من فائدة مرات
ومرات.. يعجبني شكل العلبة !

فتحت صنبور المياه وغسلت وجهي بماء النيل العكر الأصفر
الجميل

ومسحت يدي بملوثاته الرائعة واستمتعت بطعم الماء العجيب
الصدىء وأنا أتمضمض..

تناولت إصبعاً من الموز المسرطن وتناولته ثم ضغطت زر
الغلاية لأنتقم منها وأبدأ يومي بقوة، إتخذت قراراً مفيداً وصنعت
لنفسي كوباً من الشاي باللبن الممزوج بمياه النيل المفسفة التي
ربما لو نطق الفلتر للطم وحسبن وحوقل مما فلتره منها، وأخاله
سيدعو علينا كل يوم كلما استخدمناه.

اقتربت من النافذة واستمتعت بالضوضاء اللطيفة فالشارع رائع
والسيارات تتوقف فيه من روعته أكثر من مرة وجميل أن
تأمل وجوه الركاب المكفهرة وهم يستمتعون بالزحام والحر وعلى

وجوههم تتلأأ وتصفق قطرات العرق المملح.
أمامي بعيداً مدرسة ابني الجميلة والكبيرة والمشهورة لا أنسى أبداً
رائحة حماماتها المنعشة وأصوات المدرسين والمدرسات وهم
يتابعون أولادنا بأرقى الألفاظ ،

وبأصوات رحمة من حناجرهم المباركة.
وأكوام القمامة المبدعة المتكتلة في الطريق الجانبي إليها وأنا أسير
مع ابني رغم رقي المنطقة!
راقبت مرة رجلاً وامرأة، يفتشان في القمامة بحثاً عن الكنوز
التي خبأتها الليلة لهما في طيات الأكياس العبقريّة السوداء،
يمزقان الأكياس، وينشرون البهجة أمام المدرسة، ويعبر من فوقها
المارة بحنان.

تذكرت تجمع الأمهات كل يوم، قبل موعد انصراف التلاميذ وم
هو مبدع مهرجان الأزياء الذي أراه كل يوم أتردد فيه على بوابة
المدرسة، ألوان بديعة، وبناطيل متعددة الأشكال مع طرح
مزرکشة، وطلاء الأظافر الأخضر المتناسق مع الطبيعة

والحقائب البديعة صحوة دينية ومنظر خلاب
ولفت نظري الجو العكر بسحره، والغبار الجميل المنتشر في كل
مكان.

رأيت الأشجار الخضراء، والتي بدت لي كهجوز لطيفة، في
الستين وقفت بهوان وعليها مسحة من الجمال الغير لافت
للنظر، بعد أن تساقطت أوراقها النضرة.
كم أنت جميلة يا بلدي الحبيبة، لا أدري لماذا يشكون منك!
تري هل سنستطيع الذهاب إلى المصيف هذا العام؟
تساءلت في نفسي.. فكم أشتاق للسير على الرمال المختلطة
بالقمامة

وأقف وأنا أراقب الشاطيء الجميل وأمواجه تحمل لنا زجاجات
المياه الفارغة التي ألقاها الناس فيه وبعض الأيكاس والمناديل
الورقية.

فتحت موقع الفيسبوك وقلبت فيه، وقرأت مزيجًا من الأخبار
الخفيفة بين فيديو لصحفي فقد نصف وزنه ورأيت كيف تحلقت

عيناه بالسواد ووهن بعد دخوله السجن لفترة طويلة فليتهم
يعتقلون كل من يزيد وزنه عن السبعين..

وبين لقطات مصور ماهر لإحدى القرى ليرينا طبيعة سكانها
الجميلة والعملية فقد استغنوا عن كل شيء من أثاث وطعام
ويختبئون في أشياء تشبه الكهوف الرائعة.

وخبير من هنا عن زوجة لا تعلم أين زوجها حتى الآن فقد رآته
آخر مرة من تسعة أشهر على شاشة التلفاز... يبدو أن هناك
من يعتمد إخفاء أخباره عنها لتشتاق إليه.

وخبير من هناك عن شاب يتسم وعرفت أنه الآن يأذن الله
مشغول بعرسه في السماء.

سعدت جدًا بقرب عودة التوقيت الصيفي الرائع!

وسعدت أكثر بفرحة صديقتي به!

قرأت مقالات واستمتعت ببعض التشبيهات اللفظية،
والإستعارات المكنية،

والتصويرية، والتمثيلية، والتنوين والكثير من الإبداعات وخاصة
في الحوارات السياسية الخلافية، أفاظ بديعة هنا وهناك..

إبداع ...

أتابع بإعجاب الحب المنتشر بين أفراد الشعب، وألاحظ زيادة
الوعي، وإتساع مساحات التناغم بين التيارات المختلفة.
الواقع مبهج، وأنا متفائلة جدًا فنحن نتغير للأفضل، الكل
يضحك... ويضحك، راقبوا الوجوه جيدًا أيها السادة.
الكثير من الدعوات تتصاعد يوميًا، ومعظمها في السجود،
لكل من يسعدونا وأسعدونا بأفعالهم الرائعة، أرجوكم توقفوا قليلًا
فقد غمرتنا السعادة، ولتمنعوا هذا النوع من الضحك.

د.حنان لاشين

أم البنين

الفهرس:

1-إزاي تبسط مراتك

2-أفكار رومانسية

3-احترس من المرأة

4-عبارات تسمعنها من زوجك

5-ألو...بجبك....(حوارات زوجية)

6-رمضان كريم (الستات والمسجد)

7-رمضان كريم (الرجال والمسجد)

8-عبقرية الستات

9-شايفاك

10-شايفك

11-جبر الخواطر

12-تعرفي إزاي إن جوزك بيحبك

13-حاجات ما تتنسيش (ذكريات)

14-حصاد الغربية

15-الليلة الأخيرة....(حوارات زوجية)

16-الشيخة فيفي....(حوارات زوجية)

17-حوار دسم جدا

18-عريس بوسي

19-عروسة سامح

20-الملافظ سعد

21-عروسة المولد

22- وجع....(حوارات زوجية)

23- أهلاً أهلاً بالزوار

24- بنت ناس

25- مشية الستات

26- الشاويش عطية

27- غلطة

28- نوع نادر جداً

29- نباح أم العريس

30- لظلوظة المظلظة

31- لما يجيلك عريس

32- ست العرايس

33- هؤلاء مروا من هنا

34-احترس من المهلبية

35-أشياء تعين على غض البصر

36-كلام للمكبطين

37-إحتفال بريء....(حوارات زوجية)

38-حَقَّ عَلَيْهِ

39-تيكيلام ..تيكيلام....(حوارات زوجية)

40-الوردة الحمراء....(حوارات زوجية)

41-في الركن العيد الهادي

42-المرجحة بالفندقوش

43-مفاجأة....(حوارات زوجية)

44- خليك في هالك

45-عش الحب....(حوارات زوجية)

46-عريس إلكتروني

47-منتهى الحب....(حوارات زوجية)

48-حباتك

49-كلام في الحب

50-ممنوع الضحك.

جنان لا ستين